

ርኢሰ ኢሳይያስ ምስል ወዚረት ካርጅየት ግብለት ሱዳን ለሀድግ



ርኢሰ ኢሳይያስ አፈወርቂ ዮም 11 አክቶበር አምሱይ ወዚረት ካርጅየት ወመዓወናት ካርጅየት ጀምሮ የት ግብለት ሱዳን፡ ሚስ አወት ዲንግ አሸዋል፡ ዲብ ዴዋን ሕክመት እንዴ ትከብተ ሀድግ ምስለ።

ዲብ ሀድግ፡ ወዚረት አወት፡ ልእክት ርኢሰ ሰልፋኬር ምያርዲት ዲብ ርኢሰ ኢሳይያስ አፍወርቂ ተአበጽሕ እት ሀሌት፡ ለልእክት፡ ዲብ ተጠውራት ውበንዩት ሰላም ከርሰ ግብለት ሱዳን፡ ሕክመት

ግብለት ሱዳን ለትትሐደሩ ሀድግ ሰላም ፍንጌ ሕክመት ሱዳን ወሰሉሓም መትቃውመት ሱዳን፡ ወዲብ መዓወነት ኤረትርየ ወግብለት ሱዳን ለረከዘት ተ።

እምበል እሊ ክልኢቶም ለጅሃት፡ እብ ሰበት መዓወነት ቀር አፍሪቀ ፈዓልየተ እግል ልትሰእ ለቡ ምስዳራትም ሀድግው።


ርኢሰ ኢሳይያስ፡ ምን ግድለ ሰላሕ ሽዑብ ግብለት ሱዳን ለጸንሐት ዕላቀት ምስንዮት ሽዑብ ወሕክመት ኤረትርየ ወግብለት

ሱዳን እብ ድግማን ሐቆ አከደ፡ ዲብ መጽእ ወክድ እብ ትውቀለት ከም ለአተላሌ ኡብርሀ።

ርኢሰ ኢሳይያስ እንዴ አትሉ፡ ሕክመት ግብለት ሱዳን ዲብ መዲድ ሰላም ሱዳን ወመንጠቀት ቀር አፍሪቀ እግል ልቀድሙ ለቀድር ዶር ዐቢ ገብእ ከም ደምን ሸርሐ።

እት ደንጎበ ህዩ፡ እሊ እብ ደረጃት ክልኤ ለጅሀት ወመንጠቀት ገብእ ለሀላ መዓወናት፡ ለሰርግሎ ጅሃት ሕበር አሰሶት ምህም ክምቱ ሐበረ።

ንምያይ ርኢሰ፡ ርሳለት ርኢሰ ኢሳይያስ አፈወርቂ ለአበጽሕ



ንምያይ ርኢሰ አሰይድ ዮሜ ገብረኣብ እት ዮም 13 አክቶበር ልእክት ርኢሰ ኢሳይያስ አፈወርቂ አሰክ አሚን ዓም ምጅልስ ሰያደት ሱዳን ጀነራል ዐብደልፈታሕ አልቡርሃን አብጽሐ።

ልእክት ርኢሰ ኢሳይያስ እት አደቀቦት ዕላቀት ሕበር ኤረትርየ ወሱዳን ክምሰሉሁ ተንሬዝ ናይለ ቀደም እለ ለትበጽሐ እትፋቅያት ሕበር ለትከሰስ ተ።

እትለ መናሰበት መመቅርሓይ ሸቅል ሰፋረት ኤረትርየ እት ሱዳን አሰይድ እብራሂም እድሪስ ሓድር ዐላ።

ርኢሰ ኢሳይያስ አፈወርቂ አሚን ዓም ምጅልስ ሰያደት ጀነራል ዓብደልፈታሕ አልቡርሃን እብለ

ወደየ እግሉ ዐዘመት ምን ዮም 14 አሰክ 16 ሰብተምበር 2019 እት ሱዳን ጀውለት ረስምየት ዋዲ ክም ዐለ ልትፈቀድ።

እትለ መናሰበት ርኢሰ ኢሳይያስ ምስል ውቁላም ሰብ ሰልጠት ሱዳን እትለ ወደየ ሀድግ፡ እት ሕውትነት ወሕሽመት ለተንከበት ታሪካይት ግውርነት ሽዑብ ኤረትርየ ወሱዳን እግል አደቀቦት፡ ለትከሰረ አብካት ምን ሐዲስ እግል ለሐሰሴ መትዳላዩ ሐቆለ ሸርሐ፡ እት መጃላት እትቅሳድ፡ ትጃረት፡ ዲፕሎማሲየት አምን፡ ዕለክርየት ውበዕድ ጋራት መትዳላይ እግል ልዕቤ፡ እግል ዐቦት መንጠቀትን እብ ሕበር እግል ልሸቀው፡ እት እትፋቅ ክምሰል ትበጽሐ ልትፈቀድ።

እድንያይት ምዕል አዋልድ ዲብ አሰመረ ትፈቀደት



እድንያይት አምዕል አዋልድ “ደቅብ አዋልድ፡ ለኢተሀደገ እቡ ወኬርዓይ ለአለቡ” እብ ትብል ሰቅራት እብ ደረጃት ወጠን 11 አክቶበር ዲብ አሰመረ ቃዕት መክተብ መርከዚ ማሕበር ወጠን አዋልድ አንሳት ኤረትርየ እብለ ትፈናተ ወራታት ትዘከረት፡

ዲብ መናሰበት፡ ሰብ-ሰልጠት

ሕክመት ወጀብሀት፡ ዲብ ኤረትርየ ለመርከዚም ሰፈራእ ወድፕሎማሲየን እተክምሰልሁመ ዐዘመት ለገብአት እግሎም ጋሽ ሓድራም ዐለው።

ርኢሰት ማሕበር ወጠን አዋልድ አንሳት ኤረትርየ አሰይደ ተኽእ ተሰፊሚካኤል ዲብ

አሰመዐት ከሊመት፡ ወለት ሐቆ አድረስካህ ወለወጅብ አምር ሐቆ አክሰብካህ፡ ዲብ ክሉ መጃላት ምን መትቀዳም ለከርዐ ክም አለቡ እንዴ ሐበረት፡ ዲብ ኤረትርየ እብ ገብእ ለሀላ ጅሀድ ሕበር፡ መሻረከት ወመጃገረት አዋልድ ዲብ ተዐለም ለትትሐመድ ክምቱ፡ አመሳዋት ወፈናታይ

መርከዝ ተእሂል ምህናት ሳወ አንፋር 32^{ይት} ደውረት ክድመት ወጠን ልትከበት

እት እምትሓን ሸሃደት ካልኣይት ደረጃት ናይ ሸሃደት ንቃዋ ለአምጽአው አንፋር 32 ደውረት ክድመት ወጠን፡ ሳወ እንዴ ትከረው ዲብ መርከዝ ተእሂል ምህናት እንዴ አተው፡ ለእቡ ደርሶ መጃላት እንዴ ሐረው፡ ድራሰቶም ከም አንበተው ወኪል ኤሪን ሐበረ።

ዲብ ዮም 7 አክቶበር ዲብ ገብአት ናይ ሕርያን መጃላት ወራት፡ ሙዲር መርከዝ ተእሂል ምህናት መምህር ተሰፋይ ተወልዱ፡ ደረሰ ለበክት እብ ዋጅብ እግል ልትነፍዮ እቡ እንዴ አትፋቅደ፡ መዳላይለ መርከዝ አከደ።

ቃእድ መርከዝ ተድራብ ክድመት ወጠን ኮሎኔል ደበሳይ ግዴ እብ ጀህቱ፡ ቀደምም ለዐለ ደውራት እብ ከሰበው ምህናት ዲብ በራምጅ ብነ ወጠን ለልትሐመድ ዶር ቀድሞ ከም ህለው እንዴ ሐበረ፡ ምራድ ወካድም አግደ ጽዋርም እግል ልግባእ መክረ።

መርከዝ ተእሂል ምህናት ሳወ፡ እት መጃላት ብነ፡ ቴክኖሎጂ ብነ፡ ትጃረት ወእዳረት ለትክምክም፡ ተእሂል ዓም ንጃረት ወሕዳደት፡ ዕሉም ዐነድር፡ ብነ ዓም፡ ከህረበት፡ አሰነዮት ወሸበካት ኮምፕዩተር፡ ኤሌክትሮኒክስ፡ አትሳናይ ተሳጃት፡ አውቶ መካኒክ፡ ተኽጢዋ ዕሉም ሕሳብ ወሰክፊተርየት ናይ ክልኤ ሰነት ምህናት ተአደርሱ።

እትለ ሰነት እለ ለመርከዝ 1121 ደረሳይ 32ይት ደውረት ክድመት ወጠን ክምሰልሁመ፡ 572 አንሳት ለብእቶም 1286 ደረሰ ካልኣይት ሰነት እብ ዓመት 2407 ደረሳይ ብእተ።

ጋሽ-በርክ፡ ጌማም ወራታት ሕፍዘት ማይ ወትርበት ገብእ



ዲብ አቅሊም ጋሽ-በርክ እት ማዕየ ወክለን ጅሃት ሕክሙት ለትወጀህ አትፋዝያት እት ገብእ ለትከደመ ሸቅል ሕፍዘት ማይ ወትርበት፡ እበ ትወቀለት መዓወነት እግል ለአተላላፊ ከም ለአትሐዜ ዲብ 9 ኦክቶበር ዲብ ገብእ ህድግ ጎማት ተሐበረ።

ዲብ መስኡሊን አፍረዐት እዳረት አቅሊም፡ መስኡሊን ሐርስ ዲብ ምዴርያት ውብዕዳም ሰብ ምህነት ሐርስ ለሐድረው እጅትማዕ ጌማም፡ ፊራሮ ሕፍዘት ማይ ወትርበት እንዴ ትደቀበት እተይ እግል ልዕቤ ፡ አርድ ቀተሪ ወመዳንን እግል ልሰኔ፡ ማይ እንዴ ተሐፊዝ ዝሕረት ማይ ከርስ ምድር እግል ትቅዘር ወትርበት ምን መትሸርሻር እግል ትድሐን፡ ጽበዋ ትርበት እግል ልትረሸድ እብ ጅድዮት ልትሸቂ ከም ህለ ትሸረሐ።

ሓለት ከረም ወዘርእ እበ ክስሰ ዲብ ትቀደመ ተቅሪር፡ እብ ደረጀት አቅሊም ዮም ዓመት ዝያድ 200 አልፍ ሄክታር እብ ዝላም ከረም፡ 12 አልፍ ሄክታር ህዩ ሐምሌ ወፈዋክህ

እንዴ ተዐመረ ዲብ ሓለት ሰኔት ክም ህለ ትሐበረ።

መስኡል ፈሬዕ ከደማት መራቀበት እት አቅሊም ጋሽ-በርክ፡ አሰይድ ሓገሰ ገብረማርያም እተ ህበዩ ተውድሕ፡ እብ ሰብብ ደማት ለኢተክደት ነብረ ለመጽእ ሕማማት እግል ኢህሉ፡ መፍርየት፡ መወዘዐት ወመትነፍዐት ዲብ አግቡይ አፍረዮት፡ አክቤ ወመትነፋዕ ነብረ ለሰምቱ ፈሀም እብ ዓመት፡ ዲብ መትነፋዕ ከሚካላት ድድ ሀረም ወባልዒን ህዩ እብ ፍንቲት እንዴ ዐቤ፡ እብ ሰብ ምህነት ለትትህዩብ ጎማት ወመምሬሕ እግል ልተለው አትፋቀደ።

ወዘር ሐርስ አሰይድ አረፋይኔ በርሄ እተ አሰመዐዩ ከሊመት ካቲመ፡ ሕፍዘት ማይ ወትርበት አሳሰ እተይ ሰኔ ሰበት ቱ፡ እተይ እግል ልዕቤ ወደማነት ነብረ እግል ትትክደድ ዲብ ገብእ ወራታት ሐርሱ፡ እዳረት ሕፍዘት ማይ ወትርበት አወለውየት ናይ አውለውያት እግል ትግባእ ክም ትወጅብ አፍሀመ።

ኤረትርዩን ሰካን ካርጅ፡ ማሎም እት ወጠኖም እግል ልክሰእ

እት ካርጅ ለነብሮ ኤረትርዩን እት ዐዶም ረክሰማሎም እንዴ ከሰአው፡ መትነፍዐት ለገብእ እቡ አግቡይ እግል ልጥፋሕ ለአመመ እጅትማዕ ዲብ 06 ኦክቶበር ዲብ ቦለኝ፡ ኢጣልያ ገብእ፡መስኡል ቀድያት ጃልያት ወሸዐብ ዲብ ኢጣልያ አሰይድ ግርማይ ሃብተማኅኤል፡ እብ ሰበትለ ሕክሙት ኤረትርዩ ዲብ ካርጅ ለነብሮ መዋጥኒን ዲብ ዐቦት እቅትሳድ ዐዶም ዶሮም እግል ልቀድሞ ለአመመ አግቡይ ክስኦት ረክሰማል ወረክሰማል ለልትከሳእ እቱ መጃላት ወሸኖጣቱ ተውዴሕ ሀበ።

“ክስኦት ረክሰማል፡ እብ ናይ ሰያሰት፡ እቅትሳድ ወእጅማዕየት ዐዋምል ምስል ወክድ ወቱለል ተክሲር ለገብእ እታተ” እንዴ ቤለ አሰይድ ግርማይ፡ እትሊ ኤረትርዩ ክሉ ተሐድያት እንዴ ትዐዴት ሰላመ እድምንት እቱ ለህሉት ወክድ፡ መቅደረት ወጽቦዋ መዋጥኒን ዲብ ሕሳብ እንዴ አተ፡ ዲብ አተላላይ ወመሳሌሕ ለቡ መጃላት ሐርሱ ሰናዐት፡ ዲብ ተሰዲር ዐድ ወካርጅ እግል ልሸቀው አብካት ክሱት እግሎም ክም ህለ ሸርሐ።

መሸተርከት እብ ጀሀቶም፡ ዲብ ሕክሙት ኤረትርዩ እግል መንፈዐቶም ካሰተቱ ለህሉት አብካት፡ ሐድ ቅድረቶም እግል ልሻርኮ ዱልያም ክም ቶም አከደው።

እሊ ክእነ ዲብ እንቱ፡ ምን 21 መዲነት ጀርመን ለመጽአው መስኡሊን ወወካይል ጃልያት ለሻረከው እቱ መትነዛም ኤረትርዩ

በራምጅ ዐማር ለለአደቅብ እጅትማዕ ዲብ ዮም 5 ኦክቶበር ዲብ መዲነት ፍራንክፈርት ገብእ።

መስኡል ሸኡን ጃልያት ወሸዐብ አሰይድ ካሕሳይ ተወልዴ፡ እብ ሰበት ሓድረት ሓለት ወጠን ተጠውራት ሓድር ተውዴሕ ሐቀ ሀበ፡ ክለን ቅዋት እጅትማዕየት እንዴ መትነዛምን እንዴ አደቀበዩ ተጃርብ እት ልትባደለ ወምን ሕድ ለነቅሰት ዲብ ለአተመ እግል ልሸቅዩ፡ እትለ ለህሉ እተ መርሐለት እብ ፍንቲት ምህም ክምቱ ሸርሐ።

መስኡል ወራታት ዲፕሎማሲየት ገቢል አሰይድ ተክሉ ለባሲ እብ ጀሀቱ፡ ዶር መዋጥኒን ዲብ ብነ ወጠን እብ ጎማት ወአፍካር ክምስልሁመ ክስኦት ረክሰ ማል ወምህናት አደቀቦት፡ መትነዛምን ምህነት ለጸረው ወእብ ቃትን ለልትመለኮ ሸባባት አፍረዮት፡ አጀኒቶም ጅንሰዮቶም እግል ለአምሮ ወለአደቅቦ፡ በራምጅ ዝዋት ወቅት ለጠልቡ ወራታት እለ መርሐለት ሰበት ቱ፡ ለእጅትማዕ እለ መርሐለት ለገብእ ወገጽ ቀደም ለለኡብለ ስታት ለፈግር እቱ ክምቱ አፍሀመ።

ጃልያት፡ ክም ክሉ መትነዛም፡ መትነዛምን ሸዐብ ዲብ ኤረትርዩ ዲብ ካርጅ እት አደቀቦት ወሕፍዘት ሰዋልፍ ወጠን ዶር ዐቢ ክም በን ለሐበረ፡ ርኢስ ልጅነት ወጠን ጀርመን ዶክተር ተሰፋይ ዐብላሎም፡ ልጅነት ወጠን እግል ትደቀብ መስኡሊን ክም ገብእ እተን ሐበረ።

ዲብ እጅትማዕ፡ ዲብ ሸክል፡

ምህናት ሓደረት ሓለት ጃልያት ህድግ ሐቆ ገብኡ፡ ለህሉ እተ መርሐለት እግል ለገብእ አትሳናይ እግል ልግባእ፡ ሐለት ጃልያት ሕበር እግል ተሀሌ፡ ተሐድያት ብነ ወጠን ህዩ እብ መሻረከት ወፈዛዐት እግል ልትሐለፍ ለለአቀድር አግቡይ ሸቅል እግል ለህሉ እግል አርት ስታት እግል ልትዳሌ ዲብ መፋሀመት ትበጽሐ።

እት ደንጎቤ፡ እብ ደረጀት ጀርመን እስሰት ለህሉት ልጅነት ወጠን ውክለት ዱቅሪ ናይ ጃልያት እግል ትትክደድ ለትሸቂ ናይ ዶሉ ልጅነት መመቅረሓይት ሐፊት።

እብ ጀሀት ብዕደት፡ ቁንሰል ዓም ኤረትርዩ ዲብ አውሰትራልዩ አሰይድ መሓሪ ተክሰቱ፡ ዲብ 05 ኦክቶበር እግል ኤረትርዩን ሰካን መዲነት ብሪዝቤን ዲብ ወደዩ ሰሚናር፡ እትለ ብይኦት ለህሉት መርሐለት ሰላም፡ ሸዐብ ወሕኩት ኤረትርዩ ዲብ ናይ እቅትሳድ፡ እጅትማዕየት፡ ሰያሰት፡ ዲፕሎማሲየት ወዓዳት መጃላት ሻርኮ ክም ህለው እብ መስል እንዴ አትለ ሐቆ ሸርሐ፡ መዋጥኒን ረክሰማሎም እንዴ ከሰአው መትነፍዐት አርዛቅ ዐዶም እግል ልግብእ አብካት ክሱት ሰበት ሀሌ፡ ዶሮም እግል ልቀድሞ ትላከ።

ዲብ 06 ኦክቶበር እግል አንፋር ጀብህት ሸዐብየት እግል ዲሙቅራዊት ወዐዳለት ሓድረት ሓለት ወጠን ለክስሰ ሸርሕ ፋይሕ ዲብ ሀበ እቱ እጅትማዕ፡ ወራታት መትነዛም መጃምዕ ዲብ አደቀቦት ለትሰርገለ ወራታት እንዴ ትቀየመ ናይለ መጽእ በራምጅ እቱ ተሀደገ።

ዐንሰቤ፡ ህድግ እት ዐቦት ተዕሊም

ፈርዕ ውዛረት ተዐሊም አቅሊም ዐንሰቤ ዲብ ሰነት ድራሰት 2018/2019 ለትሰጀለት ፈገሪት እምትሓን ሸሃደት ሳምናይ ፈሰል ለቀይም እጅትማዕ ዲብ 08 ኦክቶበር ዲብ መዲነት ከረን ወደ።

መስኡል ፈርዕ ውዛረት ተዐሊም እስታዝ ክፍላይ ዐንደሚካኤል ዲብ አሰመዐዩ ከሊመት፡ ናይ 8ይ ፈሰል ፍገሪት፡ ምን ረውዳት አስክ

8ይ ፈሰል ለገብእ ሄራር ተዐሊም ወለትክሰብ አምር ኪሉል ለቀይድ ፡ እብ ዕሉም ለተክደደ እሰባት ክምቱ እንዴ ሐበረ፡ ሰጅልት ለህሉት ፍገሪት ምስለ ናይ ሰነት 2010 እት ትትርኡ ናቅሰት ሰበት ህሉት፡ ዲብ ዐለተ እግል ተክቅብል ወምኑ ወኬን እግል ትምጽእ ጅህድ ሕበር ክም ለአትሐዜ አብርሀ።

እስታዝ ክፍላይ እንዴ አትሉ፡ አግደ አህዳፍ እምትሓናት

ሸሃደት፡ በቃዐት ተዐሊም ቀዋሞት ወአሰነዮት፡ ፍንጌ መዳርስ ናይ ምህነት አክላቅያት ለበ መጃገረት እግል ትሰበቅ፡ ዲብ ተሌ ደረጀት ለለሐልፎ ደረሰ እግል ልትሚመው፡ ለትረከበ መካሰብ እንዴ ትፈረገ እብ ከፎ ዲብ ፈይሐ እግል ልዕቤ ወልትመደድ እግል ልትከደም፡ ክምስልሁመ ለትርኦ ድዕፍ እግል ሰራዩ እንዴ ትረከበ እግል ልትነወክ ክምቱ እንዴ ሐበረ፡ መዳርስ መትሐሳር ዛይድ እግል ለሀባሁ አትፋቀደ።

እተ ለክስሰም ጅሃት ለሻረከው እቱ ተቅዩም፡ እብ አሳሰለ ትቀደመ ተቅሪር ፡ፍገሪት እግል ትሰኔ ለሰዴ አፍካር ትቀደመ ወተሀደገ እቱ።

እት ውዛረት ተዐሊም ሙዲር ዓም ፈርዕ ተዐሊም ዓም አሰይድ ሙስ ሕሴን ናይብ እተ አድመዐዩ ከሊመት፡ ጌማም፡ እግልደረሰ ለልትዮብ ጀዋእዝ ወአትናያት፡ ኢሰቲር ድዕፍኩ ተቃሪር ዋድሕ ከም ለህሌ ወዲ ወስታት ዐቦት አዳለዮት ዲብ ሰርገል ዐመልየት ደሪስ ወአደረሰት አህምየት ዐባይ ክም ቡ አፍሀመ።

እተ መናሰበት፡ ዲብ እምትሓን ሸሃደት 8ይ ፈሰል ሰነት ድራሰት 2018/2019 ንቃዋ ውቁል ለአምጽአው ደረሰ ጃኢዘት’ ኦርያን’ ትህዩበው።

አሰነደ፡ ሓለት ሐርስ ዮም-ዓመት ሰኔ ክምስል ህሌት ትሸረሐ

ሐረሰቶት አሰነደ- ምዴርየት አሰማዋ ቀደም ከረም ለሰርገለው ወራታት ሕፍዘት ማይ ወትርበት ሐቆ ሐርስ ዲብ ግርሆም ለወደወ መታብዐት ዲብ ዘርኦም ፍገሪት ከም ረክበው ምን ሸርሐው።

ዘርኦም ዲብ ደረጀት ወዐጭ ባጽሕ ክም ሀሌ፡ ምናተ ዲብ ገሌ ድዋራት ባልዒን ልትርኡ ክም ህለ እንዴ ሐበረው ለሐረሰቶት፡ ለመሻክል እንዴ ኢልትኬለም፡ ውዛረት ሐርስ ዲብ ጎማት ሰብ ምህነት ድድ ባልዒን ደወ እግል ተክዳሌ እግሎም ጠልበው።

ዲብ አወርሐት ኦገስት ወሰብተምበር መትመዳድ ሰኔ ለበ ዝላም ምን ዘልመት ሰክየት ክም ረክበው እንዴ ሐበረው ለረክዮም ለሀበው፡ ቀድዮት ድድ ባልዒን ምስዳር ሻፍገት ከም

ተክትሐዝዩ ሐበረው።

እት ምዴርየት አሰማዋ፡ ዲብ 4 አልፍ ሄክታር ማሽሉ፡ ዝያድ አልፍ ሄክታር ህዩ ብልቱብ ወአዝርኦት ዜድ እንዴ ትዘርእ ዲብ ደማን ለበ ደረጀት ክም ህለ እንዴ ሐበረ መስኡል መክተብ ሐርስ ዲብ ምዴርየት ሻብ ያሲን ዐሰማን፡ እብ ሐረሰቶት ለትቀደመ ጠለብ ዲብ ኦክት ምንማቱ፡ ለሓለት ብዙሕ ለተክፈርህ ከም ኢኮን። ወመታብዐት ትገብእ ክም ህሌት አፍሀመ።

ሻብ ያሲን እንዴ አትሉ፡ ውዛረት ሐርስ ዲብ ከረም 2019 ለርኡይ ህለ ባልዒን ለጋብህ ዘርእ እግል ተክዳሌ ክምቱ አከደ።

ባርንቶ ሕገዛም ደረሳህ ትሰዴ

መክተብ ውዛረት ዐመል ወራዐዮት እጅትማዕየት ምዴርየት ባርንቶ፡ እግል 80 ዩታይም ወሕገዛም ደረሰ ሰዳይት ኣላት ምህር ወደ።

ለሰዳይት፡ ከራሪሱ ቦርሳት፡ አቅሉም፡ ርሳሱ፡ መሳሓት፡ መስጠራት ውሓባር ከም ትከምክም መስኡሊትለ መክተብ አሰይደ ህነ ዐሰማን አፍሀመት።

ወኪል ከደማት እጅትማዕየት ምዴርየት ባርንቶ ሻብ ዮናስ ኢዮብ እብ ጀሀቱ፡ አህምየት ወሀደፍ ናይለ ሰዳይት እንዴ ዘክረ፡ ሙጅተማዕ እብ ዓመት ዓይላት ህዩ እብ ፍንቲት አጀኒቶም እብ ዋጅብ እግል ልታብዖ ወለራዐ ትፋን።

3^ይ ክፈለ

ድርሆይ ወዝክርያቱ

ድርሆይ ወወልዱ ከረን እንዴት ሐልፈው እብ ምክራይ ጥንቁላሐሰ ዲብላ ፋዩሕ ጋድም ክምሰል ትከረው፡ አሕመድ እት አቡሁ እንዴት ትወለቡ፡ “ፋንቡ በጽሐነ” እት ልብል ትሰክለዩ። ድርሆይ እት ልሰሐቅ፡ ፋንቡ ልሰሐ ኣቅርደት፡ ባርንቶ፡ ሀይትተ ተሰነይ ውበዕድ መዳይን ነኣይሽ ክምሰል ሐለፍናቱ ለእንበጽሑ’ ክምሰል ቤለ ዝክርያቱ ንእሹ ሰበት ትፋቀደ፡ ለዘበን ለምሰል መጽዕን ከርከር እት ልብል ሰብኩ ወሳግመ፡ ለዐለ አውካድ ፈቅደ። እት መደት ለሀ ለመጽዕን አዳግ ወአብዕረት ለበዝሐ እቱ ክታር መጽዕን ምሰለ ግረ ወቀደም እንዴት ካልፈለ ለሰብክ ሐ ወጣል እንዴት ፋቀደ ንእሹ ትሰራበበ።

ሒን ሰብክ ክምሰል ተመ ዐድ ድርሆይ ቀደም ምን ሮረ እንድላል እንዴት ትበገሰው መስሐል፡ ቀጣኒት ምኑይ ዛግር እት ልብሎ እት ካልኣይት አው ሳልሳይት አምዕሎም ሮረ በቅለ እንዴት ትመዩው፡ እብላ ምን ሰመ አስክ ምድር ትትከሬ ለትመሰል ሰጋደት አብጋሽሽ አስክ ባብ ዐጋም እት ለአድሮሩ፡ እግለ ምን ቃብል ለልትረኤ አድብር፡ መሓዛት፡ አወድግ ምሰለ ጋምል ዕጩ እት ለዐፌ ልግዕዙ ለዐለ መግዕዝ ትቅብ ቤለ እቱ። ምን እሊ ባካት እሊ አስክ ድዋራት ቅሮረ ወቶከር ለዐለ ናይ ዐስር አምዕል ሰፈር እብ እገር ህዩ ዝያደት ምን አስክ ፋንቡ እት ረኣሰ አቶቡስ እት ከራሲ ሓምል እንዴት አስተረሐ ሳፍሩ ለዐለ ሰፈር ትሰፈለለዩ። ለእብ ወረብ ወግውሐ ካዩዱ ለዐለው ምድር ወዲብ ክል ሕምግሌለ ልትመዩው እቱ ለዐለው መሳክብ ምሰለ እት ገበይ ልትሓበሮም ለዐለ ለኢለአሙሩ አድሁይ ዝያደት ልትረዩሕ እግሎ ዐለ። እት ወክድ ለሀይ ለገበይ አክለ ትነተለት ወሬመት፡ ወህቱ አክለ ተዐበ ወደዩረ፡ እግል ዋልዴት “ቀረብኻ ማሚ?” ልብሎም እት ህለ ወዋልዴት “አይወ ቀረብኻ፡ ሎሂ ደቢራይ ክምሰል በጽሐነ ዲቡ እግል ንሕደርቱ” ልቡሉ እት ህለው ትፋቀደ። አዜመ አሕመድ ወልዱ ልሰሐ ሐጋት እት ህለ “ፋንቡ ቀረብናህ ማሚ?” ክምሰል ቤለዩቱ እትሊ ክሉ ዝክርያት ማሌ ለአተ።

ድርሆይ ሐጋት ክምሰል በጽሐ ምሰል ሐጋትመ ገሌ ዝክርያት ይሐግላ። ዲብ ሐጋት ለኑበር ወድ አቡሁ መደት ሐቱ ካሮ እንዴት ትዛበ ድርሆይ ሕጅት እት ነቅፈ እት ወራታት ዮምያት ለአንገዋጌ፡ ዲብ ሐጋት እንዴት መጽአ እግል ልሽቄ ክምሰል ሐበረዩ፡ ድርሆይ እንዴት ኢልትአከር ሐጋት ትከረ። ካሮሁ ዶል ናይ ሽሕነት ዐፍሽ ወዶልመ ናይ ማይ እት ባድሉ፡ ዲብ ሐጋት እት ልትአመር ጌሰ። ድርሆይ ምን ጠቢባቱ መስሐቃይ

ወመዳግማይ ሰበት ቱ፡ ክሉ ፈትዩ ዐለ። ምሰል ሰብ ሐጋት እት ልትአመር ወእብ ፍንቱይ ምሰል አውኪራት ህዩ ዝያደት ፍቱይ ቱ። ካሮሁ እት ለሐሌ ወሰንቄ ገሌታይ ክምሰል ጸንሐ፡ አብ ጀማል ሐቱ መደት አጣል ሰበት ረክሰ፡ አፎ ዐጣል ኢንዛቢ” ክምሰል ቤለዩ ድርሆይ እት ልሰሐቅ፡ “አጣል አዜ ላተ ዐበቅ ለአክልሱ፡ ቀደም እላመ ዶል ሐሰያት ጃርቆ ወዶል ምድር ሐባብ እት እምብል እንርዕዩ ክምሰል ይዐልነ ሚ አስተፊድነ ምኑ?” ቤለ ወሐር፡ በሰ ሰዳነ ህሌክ ምንገብእ እት ባካት ደዕሮታይ ወዐደርዴ ገርሀቲት እንዴት አጀርን እግል ንሕረሰ ግሬሻት ግኑሕ እግልነ” ክምሰል ቤለዩ፡ አብጀማልመ “ደሐንቱ፡ ምን ተዋብ ሐርሰ ሐይሰኒ ሐቆ ትቤለ ላተ እግል ሐርሰ ወእጃር ለገብእ ሰላዲ እነድእ እትከ በሰ፡ ለገርሀት ርኩብ” ቤለዩ ወሰላዲ ናድእ እቱ ዐለ። ድርሆይመ ይሐምቀ ዲብ ባካት ዐደርዴ ገርሀት እንዴት አጀረ ብልቱብ ዘርአዩ።


አቶቡስ ከረ ድርሆይ ምን ሐጋት እንዴት ሐልፈት ደዕሮታት ክምሰል በጽሐት፡ ድርሆይ ድማን ወድገለብ እት ለትቃምት እግለ ፋዩሕ ጋድም እብ ሐርሱ ወጀራዲኑ ለዐፌ ዐለ። እሊ ጋድም እሊ ቀደም ሕርዩት እብ ዕጩይ ተወይ፡ ቆግ ወቅሰለ ምክራይ እግር ይዐለት እቱ። ሐር ላኪን ሄድኑ ለትትበህል ሼርከት እት ሐርሰ እግል ትበድሉ ክምሰል ትሰለጠት እቱ ወዕጩዩ ክምሰል ገበት ምኑ ጋድም እብ ሃሉ እት እንቱ ተርፈ።

ድርሆይ እበ ሸባክ ዲብ ለትቃምት ወመኪነት ገጽ ቀደም ዲብ ትትሀርቡብ ቢንቶ ሽዕሎቲ እንዴት ሐልፈት ሕዱድ አቃሊም ዐንሰበ ወጋሽ በርከ ለትፈናቱ ያፍተት ክምሰል በጽሐው፡ ግረ እሊ ለህለ ሰፈር እት አቅሊም ጋሽ በርከ እግል ልግበእ ቱ። ዐደርዴ እንዴት ኢለአቱ ህዩ ድርሆይ ገርሀት እንዴት አጀረ እት ከረም ለሀ ሐርሰዩ፡ ዝላም ሰጅት ምንመ ዐለት ለገርሀት ለሀ ሽልሕት ሰበት ገብአት ዝያድ ዐስር ኩንታል እግል ልጃቅፍ ምን ልታኪ ዐለ። ላኪን ገርሀት ድርሆይ ዐስር ኩንታል እንዴት ኢገብእ ሐምሰ ከሪጠት በህለት ርቡዕ ናይለ ልሰእዩ ለዐለ እክል ዐምረት እግሉ። እሊመ ምሰለ ዲብ ገርሀት እንድላል እንዴት ሐርሰ ሸዒር ወሸንራይ ዲብ ልብል ዶል ዲብ ጸግእ፡ ሀረዋ፡ በቲክ ክዩድ ከረም እብ ግዲደ እንዴት ተዐበ ዐረድ እሊ ዕመር እሊ ተዐምር እሉ ይዐለት። እሊ ገርሀት እሊ ላኪን ሐርሰዩ ዲኢኮን ክመ ናይ ሮረ ብዙሕ ኢተዐበ እተ። እብሊቱ ህዩ ድርሆይ አልሐምድለ እንዴት ቤለ፡ ለክልኦት ኩንታል ወርቡዕ እንዴት ሀበቱ ወዐጌበ እንዴት አዝበ

ዐብደለ መሐመድዐሊ (መዐልም)

አስክ ነቅፋሁ ክባባይ ገብእ ምኑ።

አቶቡስ ከረ ድርሆይ ዐደርዴ ክምሰል በጽሐት ጀሀት ድማን እንዴት አወለጠት “የለ ፍጡር እንሰር ሸፈን” ቤለ መሳዕድ ወአዳም እግል ልትካሬ አሰክለዩ። ዐደርዴ ሐቆ ምን አቅሊም ዐንሰበ ትባለሐክ አሰልፍ ዲብ አቅሊም ጋሽ በርከ መርሐበ እንዴት ትቤ ለትትከበተክ መዲነት ቱ። ድርሆይመ ምሰል ወልዱ ዲብ መዋዕም ትከረ። ለመሳፍሪን ለበዝሐው ምኖም ሰገ፡ ፋል፡ ዐደሰ ውበዕድ ጠልብ እት ህሌት፡ ድርሆይ ላተ ለምን መዋሰላት ታርፋት እግሉ ለዐለዩ 140 ነቅፈ ሰኒ ጠም ዐየን፡ ሓድረት



በኪተት ተ ለልብል አመሉ እንዴት ረረሰዎ፡ ክልኦት ሻሂ ወክልኤ ባካት ጠልቡ መስኪናይ አሕመድ ክምሰል ብዕዳም ሰነ፡ ሰገ እግል ልናትል ክሰረት እብ ዐደሰ እግል ልላውሽ፡ ፋል ሳይ ወምሰለሕ እት ልብል እግል ልሕሬ ወልክሬ ኢቀድረ። ዕንታቱ ሸንክትለ ለሐሰት ወለጠዐመት ነብረ ላውሾ ወገማዶ ለዐለው አዳሚን ዲብ ለትቃምት፡ ለዲብ እዲሁ ዐለ ሻሂ ወባነት ለሀይ ከቀደም ለሀይ እግል ኢልትወሐ ምኑ እት ልደገግ፡ እብ መልሃዩ ምን ባካት እት ሸርፍ ወምነ ክባዩት ፊት እት ልብል መደት ጸንሐ።

ድርሆይ ላተ እት ነብረ መትቀራቃብ ኢፈቱ። አዲግ እንዴት አትመመ፡ ለገዛፍ ዕመቱ ምን ግረ ሐደበት ረያም እንዴት ደልደለ ምን ገንድል እት ህለ አጅያቡ እብ ሰላዲ ለትከየለ መሰል እትከ። ድርሆይ አስክለ መሓሰብ ልደለል እት ህለ፡ ቃሊ ጠለባት ለሓሰብ ለህለ እት መሰል ባክለ መሓሰብ ክምሰል ቀርቡ፡ ጀረሶን ምን ቃብል ዲብ ልትሀራሀር “ዐስር ክልኦት ነቅፈ ሓሰብ” እት ልብል ተሀራሀረ። ድርሆይ ሕሳቡ እንዴት ደፍዐ “የለ

አሕመድ” ቤለ ከህቱ ወወልዱ እት ቀደም አዳም ዲብ አቶቡስ እንዴት ዐርገው እት ክርሲሆም ጀግሐው። አዳም ክሉ ክምሰል ትጸዕነ ህዩ አተቡስ ሓን-ሓን ሐቆለ ትቤ እበ ውጤት ሰከት አስክ ምውዳቅ ጸሓይ ሸንክት አቅርደት ገጸ አራብደት። ቀደም አቅርደት ላኪን ኢትገኔ ወገርሳይ ለልትበህል ደገጊት ህለ። እሊ ባካት እሊ ምድር ሐርሰ ወጀራዲን ሰበት ቱ ለእመር ፈናን መርሐም አልአሚን ዐብደለጢፍ ዲብ ሰቲናት “ገርሳይ ወለይ-እንግርኔ ጀራዲነ ትከለሰ” ዲብ ልብል ለሐለዩ እሉ ሕላዩት ምን ድርሆይ ልትበሰጥ እቡ ሐልዩት ሰበት ገብአት፡ ለድዋራት ዝያደት እት ለትቃምት እግለ እት አዋራፍ መሓዛት ለዐለ ጋምል

ዐርኮኮብ እት ለት ቃምት ለ ሰ ፈር ሰ ሂ

ዐጅቡ። ለ ፋ ዩ ሕ ሕሊል በርከ ክምሰል በጽሐው፡ መኪነት ዲብላ ዘበናይ ቢንቱ ክምሰል ገድገደት እቦም፡ አሕመድ እግል ሰልፍ መረት “ደብ መኪነትና ዲብ ቤት ተኣቱ እብኻ ህሌት” ክምሰል ቤለዩ ድርሆይ ዲብ ልሰሐቅ፡ እሊ ቤት ኢኮን ጣይ አቡካቱ፡ እሊ ክብሪ አው ቢንቶ ልትበህል፡ መኪይን ወሐዝ እግል ኢልክርዑ እንዴት ትበህለ ለትሸቃ ቱ። ትርእዩ ህሌክ አዜ ውሐዝ ልውሕዝ ወመኪይን ልሄርር፡ ሐራ እሊ ቢንቶ እሊ ምን ኢለዐሌ እት ሒን ከረም መኪነት ተወዝ ወኢትቤ” ቤለዩ ከእብ ሰበትለ ዐቢ ወዋወር ኩብሪ ኢትገርኔ ሸርሐ እግሉ።

አሕመድመ ሕሚት አለቡ ዲብ እብ አድብር ለትከለለት መዲነት ነቅፈ ሰበት ትወለደ ወዐቡ፡ ክእነ ላቱ ሰፈር ናይ ሰልፋቱ ለዐለ። ክእነ ፋዩሕ ጋድምታት፡ ርሒብ መሓዛት ጸላም ጽርግዩ፡ ጋምል ዕጩ ዐርኮኮብ ውበዕድ ርኢ ኢኮን። ለሰፈር ለሀይ ህዩ ምን አቡሁ ወለዐል ዝያደት ህቱ ርዮሕ እግሉ ዐለ። መኪነት ዲብ ትትፌተት ገርሳይ ወኢትገርኔ

እንዴት ሐልፈ ዲብላ ጀላል አቅሊም ጋሽ በርከ ላተ መዲነት አቅርደት ክምሰል በጽሐት ድማን እንዴት ሸክፈት ጅወት መዲነት አቱት፡ ናቅሰ ምን ለዐለ እግል ተኣትምም አዳም እንዴት ትለቀመት ህዩ እብ አሰረ አቅበለት ከገበይ ባርንቶ ትማጤት።

ድርሆይ ምን መዲነት አቅርደት ዲብ ፈግሮ እንክር ድማን ለዐለ ሐዲሰ መባኒ እት ለዐፌ፡ ለመባኒ ለሀይ እዲሁ ሓልፈት እቡ ክምሰል ትዝከረ። ለወክድ ሐቆ ወራራት ወያኔ ቅዋት ድፈዕ ኤረትርየ ዲብ ወራታት ዐማር ፍሩር ለዐለ እቱ ወክድ ድርሆይ ለዐለ እት ውሕደት ምሰል ሼርከት ብነእ ሰገን እት ትዓወን ለበኔቱ አብያት ቱ። ድርሆይ መጀመባቱ እንዴት መርሐ እግል ሰልፍ ኢነት ምን ሸቅዮት ድፍዓት እንዴት አባረ እት ወራታት ብዝዩት አብያት ፍሩር እቱ ለዐለ ወቅት ትቅብ ቤለ እቱ። ክፈል ጄሽ ድርሆይ ምን ከበሰ ክምሰል ትከረ፡ ዲብ ባርንቶ፡ መገሎ፡ ከዕላይ ክምሰልሁመ አቅርደት ዐደርዴ ወመንሱረ እት ወራታት ዐማር ወተድራብ ወሄራር እብ እገር እንዴት ትፈረረ ምን ጽሙድ እቱ ለዐለ ሐርብ ወዴቅበት አባይ እቡሩይ ለዐለ እቱ ወቅት ቱ።

ድርሆይ ወወልዱ እት ከራሲሆም ሸንን እት ወዱ ምን አቅርደት አስክ ባርንቶ እት ህለ ባካት እግል እብ ከረም አክደር ጋብእ ለዐለ ጋድምታት ወዐክል እት ለዐፋ፡ እግለ ዲብ ጋድም እንዴት ትበረረት ምን ጋምል አሰዕር ትብሌዕ ለዐለት ሐ፡ ክምሰልሁመ ዲብ ወቁል አድብር ለህንጠዋዋል ለዐለ ግዩም፡ ምሰለ እቱ ሸፋል ለዐለ አንውየት እት ለትቃምቶ ለሰፈር እግል ክልኢቶም ለኢትትረሰዕ ሐውልዮት ዐለ። እብ ፍንቱይ ድርሆይ እግል ድማን ወድገለብ ናይለ ገይሶ እበ ለዐለው ገበይ ፍንጥርት ለዐለት ሐ ርሸድት አክለ ረኢ፡ ለዲብ ሐሰያት ሮረ ሐባብ ቀዋፈት ወሰዐረት እግል ትብላዕ ረኢሰለ ግምጩይ ደይን እት ተህንጠዋዋል አረይ ጸደፍ ትገብእ ለዐለት ቀንጭብ ሐ ረወሪት አክለ ፈቅደ፡ ፍንጌ ንዋይ ሮረ ወንዋይ በርከ ለህለ ፈርግ ሰኒ ዐቢ ክምቱ ሸክ ኢወደ።

ድርሆይ አስክ ባርንቶ ክምሰል አተንከባመ፡ እግለ ጋምል ሐቅ ወክትሪት ምሰለ ልትናፈር እቱ ለዐለ ጅንሰጅንሱ ሰራይር ወእት ረኢሉ ለህንጠዋዋል ለዐለ አብያቱ እት ለትቃምት፡ እግል ዲብ አድብር ሸፍልት ለዐለት እንሰ፡ ወጣል እት ለዐፌ፡ ለበዲር እት ንእሹ ምን ሮረ ሐባብ አስክ ድዋራት ቅሮረ ደምቡብዮት እንዴት ሰብከው ለኣውሎ እቱ ለዐለው ባካት መፍለክ፡ እንዱሉ፡ ተፍሌናይት፡ ክርቡ-ገዕ፡ አሸሐጌ ወረኣሰ ደምቡብዮት ውበዕድ ድዋራት ሰሕል እት አዋይን ምሰለ ላሊ ወአምዕል ጀመም ትብል ለዐለት ዝላሙ ሰዕሩ ወዕጩዩ አክለ አትዋየን ዝያደት ትሳፋለለ ወትሰራበበ።

ዲብ ገጽ 7 ልተላላፊ . . .



ወቀይ ሀይአት ዐቦት መንበር እት ምዴርየት ዐዲ-ቀዴሕ



ከሕሰ መሐሪ እት መንበር አንሳት ተቅደር እግል ልምድ ለትከድም ዕዱ ውዛረት ሐርሰ ሀይአት ዐቦት መንበር እት ምዴርየት ዐዲ ቀዴሕተ። እሊ ዐቦት መንበር ለልትበህል መሸሩዕ ከአፎ ክምቲ ወሚ ክም ሸቄ ምንላ እሊ ራፍዐት መዝ እንዴ ትገባለት ተአፍህም።

መንበር እግል ትሰኔ እግል ንሸቄ ወንትጀሀድ ላዝምቲ - እብ ግላይክ ትገብእ ሰበት አለቡ። እት ብሩር መንበረት ለለሰኔ ወለለቀልል ብዙሕ አብሳር ምንመ ህለ ምሮ ምኑ ዘበናይ እቶን እት ክሉ ብሩር ወመዳይንመ ልግበእ ክም ለህሌ ውድየትቲ። ለእቶን ናይ መገጎ ሌጠ ኢኮን። መቅሎ ወግድርመ ክም ልተኪ እቲ እንዴ ገብአ ክም ልዳሌ ትባሰረ። ሕነ ለእንሸቄ እቲ ደዋሐ ከረ መእለዋየ። እምበይቶ፡ እምበ ጨላይ ወባኮቲ አሰክ ሰለሰ ምእት መገጎ ሻቅያም ሀሌ። ሐቀሁመ እብ አፍራድ ለትወሰከው (ለሸቀው) 13 ነፈር ሰበት ሀለው 313 ባዱሕ ሀሌ። እትለ ምዴርየት ዐዲቀዴሕ ለዐለ ዐዶታት ክሉ እሊ ዘበናይ እቶን ሸቄ ሀሌ። ፈድል እሊ መገጎ እሊ መንበረት ብዝሓት አንሳት ወእብ ዓመት ዓይላት ሳንዩት ሀሌ። እግልሚ እሊ እቶናት እሊ ለጠልቦ ዕጩሪ ሐድቲ ወዕጩሪ ገናዳታትመ ኢሊሐዘ። ምንቅሩብ ለልትረኩብ ለቃቂም ወቀሸብ እት ትነፈሶ ሐቲ ዶል ለመእኦ ዕጩሪ መደት ረያም ለአጸኔሕ። ከረ ክቦ ወ ድፈ (ዓኩር) የም ኡዳም እግል ሸፍር ሰበት ልትሐገዝ እቲ እት እሳት እግል ለአክምዶ ኢልሐዘ። ምንሕኔት ለሸፍሩ ለአነድድ ምነ እት አፍያቲ ለህለ ወደድቅ ቀላሚጦሳት ውበዕድ ቀሻሽብ እንዴ ትለቃቀመ ልትዓወን ሀሌ። ፈድል እሊ እቶን ትረኩብ ለህሌት ዓፍየት ወረህየት ወሰፍ አለቡ።

አንሳት የም ምን ርሰሐት፡ ሕመት ወሕማማት እንዴ አባረየ ዕርጌህን ወከድቤተን፡ ገጸን ወልባሰን በርሀ። ምን ተናን ወመዳየገት ትንፋሰ እንዴ አባረየ ዕንታተን ረክበየ ወአንፎታተን ቀደ። ተናናት ክም ለዐተግትግ እትን እብ ሕዲ ህወ ነዲፍ ልትደውረረ ለዐለየ የም ፊገየ ወንፍሰን ረክበየ። ህተን ሌጠ ኢኮን ርዝቅ ጠቢዐትመ ፈየገ። ዕጩሪ ትመሐከ፡ ናይ ከደን እት ከደኑ እግል ልውሸዕ ወልፍሬ

በክት ረክቦ ወደለ ትሸተለትመ ዕምር ረክቦት። ዕጩሪ ጋምል ሀይ ዝላም ወጠላለት ልሰሕብ፡ ትርቦት ምን መትሸርሻር ለሐጅብ፡ እብ አቀጥፋ ወቀረፋ ረሸደ፡ ግርመቲመ ዕን ትሳሬ። ዕጩሪ ሌጠ ሚቲ! ውቀትመ ትመሐክ። እማት ወአዋልድ ዘበናይ እቶን ክም ገብአ እለን፡ ምድር ረዩም እት ገይሰ እግል አሪ ዕጩሪ ለአበድያህ ለዐለየ ውቀት ወሐለት ሰኒ ወአማን ትውሕድ። ለረክባህ ዕርፍ ሀይ ትዘይድ። ህተን ዕርፍ ውቀት ክም ረክቦየ እት ምህሮ እግል



ልፈክረ ንዩት እግል ተህሌ እለንቲ። እት ሕፍዝ ወሸቅየት ዋጅብ ቤት ናይ ምህሮህን እግል ልፍደያቲ። እት ምህሮህን መትጃግረት እንዴ ገብአየ ሰብ ዕልም ወምህነት ወሰብ እተይ ሰኒ እግል ልግበአቲ። እት ተጃረት፡ ሐያት እጅትማዕየት ወሰቃፊት እግል ልሻርከ ወክድ እግል ልርከባቲ። እሊመ እብ እንክሩ እተ ዐቦት ናይለ መጅተመዕ ቀላል ለኢትበህል ተረት እግል ተህሌ እለቲ። እሊ እት ዐቦት መንበር ዶር ዐቢ ለህለ እሊ ዘበናይ እቶን በገ፡ እት ክል ቤት አሰክ ለአቲ ሸቅልን እግል ልብጠር ኢኮን ትብል አሰይደ ከሕሰ። እንዴ አትሌት፡ “እለ ምህመት እለ አሰክ እለ እትመማመ ወሀሌን ላኪን እዴ ተሐጭር ገአት፡ እት እለ ሐዘክ መዋሰላት ኢልትረኩብ፡ ለእቡ እንሸቄ ሐጻይን ውበዕድ ሓጃት እት እለ ትሰተት ኢልትረኩብ፡ ከእብሊ ወእሉ መሰል መዐናቅፍ እብ ደፋይን እግል ኒጊሰ ንትቀሰብ” ትቤ።

ውዛረት ሐርሰ ሀይአት ዐቦት መንበር እግል አንሳት እብ ከፎ መትነፈዐት እቶን ዘበናይ(እቶን አድሐነት) እግል ልግበእ ክም ትሰድዮንመ ሸርሐት እነ አሰይደ

ከሐሰ። ሰልፍ አንሳት ናይ ሐቲ ቀርየት 10 ምዕል ለትከልእ ደውረት ልትሀየቡ። “ኖሰን እንዴ ሸቄን እብ ዐመል ነኦርእየን። ፈዳብያት ተን! እት ዶለን ትምሳል ናይለ እብ ዐመል እግል ልርአየ ለሸቄናሁ እለን እቶን ዘበናይ ኖሰን ሸቅየ።” እት ትብል ሀይ እብ ዘካየተን ትትዐጅብ። ምነ እለን ዐለመየ እት ዐድ ክልኤ ሰለሰ እሊት ለሸቅል መልከያሁ ምንገብእ (ወላዝም ለሀልየ እተን) እግልን መዓልማት ወድያህን። ለሃከ መለሀየ ወጎረ እት ተዐልም እግል ክለ ለቀርየት ሸቅየ እሊ። ለመሻቀዩ ከረ ተናን ለፈግር እቡ ቱቦ ውበዕድ እግል እቶን ለለትሐዘ ሐጻይን እብ ሀይአት ዐቦት መንበር ልትሀየቡን። ሰፋየት ናይለ ሸቅልመ እብ ሀይአት ልትመዘን ወመራቀብት ትገብእ እቲ። “ለተድራብ ኢለአትካርምኒ” እንዴ ትቤ አሰይደ ከሕሰ፡ አክለ ሚዛንየት ትረክቦት እት ልትፈረረ ክም ለዐልመ ተአክድ።

እት ምዴርየት ዐዲ ቀዴሕ ልግበእ ወክለ አቅሊም ግብለት ሰር ምነ ዓይላት እሊ ዘበናይ እቶን ሻቅያት ሀሌ። እት ቀደም አዜ ልትሸቄ ለዐለ፡ እግል መገጎ ለገብእ እቶን ሌጣቲ

እህትማም ልትሀየብ ለዐለ። አዜ ላኪን ሰለሰ እቶን ናይ መገጎ መቅሎ ወግድር ምስል ልትሸቄ ሀሌ። እብል ዲብ ተአንግር እብል ትቀሌ እብል ጽብሐ ትወዳ። እት ሰርገል ወራት ቤት ኖሱ ሰኒ ሰዴ ሀሌ። ለንድቀቲ ምነ ምድር ለዐል ርፈዕ እንዴ ቤለ እግል ጭሕረት ምንገብእ ወናገፎት ውጢት ተ።

ለዘበናይ እቶን ምንክትረትለ መንፈዐቲ በሰጠተ፡ አሰይደ ከሕሰ፡ “ሸቅልን እብ ሚዛንየትን ልትቃኔ፡ በርናመጅ እግል መእለውየ ፋግር ሀለ ምንገብእ ማእለውየ ናየ፡ ዐዲ ሐዲድ፡ ተገሬን . . . ክል ሐቲ ናየ፡ እብ

ክምሰልሁ ነኦትባጸሐን። ከረ ሕረት፡ ደርዐ፡ መእለውየ፡ አውሁኔ - ሰቡዕ ሰማን ዐዶታት ሸቄይ እለን ሀሌ፡ ናይ ኢጊላ ሀይ እሊ ዱልይ ሀላቲ። ላመ እብል ሀይአት ለኢትበጸሐ ለሸዑብ እብ ኖሱ ለአሸቄ እንርኤ ሀሌ። አሰክ ዲብ መዳይን ለአሸቀየ ሀላየ፡ ሕዳትመ ኢኮን። እት ዐዶታት ክም ጌሰየ ለመንፈዐት ልርእያህ ከእግል ልሸቀየ እለን ለዐዝማህን አውመ እግል ልጋነሐ ክም መጽአየ ሸቀየ እነ ልብላህን። ሕነ ምርኩብ ሌጠ ለሀበን ድኢኮን ጀለ ደሐን ወዓፍየት አንሳትን ወግማል ዕጩሪን እት ክል ቤት እግል ነኦትበጸሐ ናውያም ሀሌን” በሃሊት ተ።

ሀይአት ዐቦት መንበር ሸቅለ እት አሰሐባብ መትነፈዕ መገጎ አድሐነት ሌጠ ኢበጥር፡ አንሳት መንበርህን እግል ትሰኔ ሸቅለን እግል ልቅቅለል ወአፍካረን እግል ልትጠውር ብዙሕ መሻሬዕ ዲቡ ተአወቁ። ዕቢያት አጀኒት ዐፋይ፡ ነዳፊት ቤት፡ ድዋር ወናሱ፡ ራትዐት ገበይ መነት ለኸሰሰ ምህሮ እግል ዓይላት እት ዐዶታተን እንዴ ትበጸሐየ ክም ለአምራሁ ትጸገም። “አዜ ዲብ ሐን መሰኡልየት ርዝቅ ንዋይ ናይ ውዛረት ሐርሰ ገብአ ድኢኮን በዲር ደወርህ፡ አግል ውበዕድ እንሰሰመ ነሀይብ ወአግቡይ አሰሳኑ ንዐልም ዐልነ” ትብል አሰይደ ከሕሰ። ገበይ ጽብጠት ጀራዲን ለዐለመያህን አንሰ መናድሊን አርድ እንዴ ተሀየቦየ ለአፍረየ ሀላየ። አሰክ መቶራት ለትዛቢያመ ሀላየ። እትለ ሀሌናህ ሓላት ሰብ ሐርሰ ነሐር አዳም ልትገደዕ ምኖም ገብአ ከክምለ ብጋሰተን ኢጊሰየ ድኢኮን መግባሰን ግሩም ክም ዐለ ሀይ ተአፍህም።

ሀይአት ዐቦት መንበር ለተሀይቦ ተዕሊም እብ ፍዕል ለተላቲ። ለትፈናተ ነበሪት ምነ እት ባክከ ለህለ ከፎ ለዘቲ ወጽበጡ እንዴ ኢተአክርብ ተአዳልዮ ለአርእያህን። “በዲር ሚዛንየት ምን ዐለት እነ ለልትሸቄ ነበሪት ምን ኖሰን ነኦመጽኦ ወነኦርእየን ዐልኑ፡ አዜ ላኪን ምስለ ሓላትለ ወጠን ለሚዛንየት ትገደዕ እትነ ሀሌት” ሐቀለ ትቤ አሰይደ ከሕሰ፡ ልተዕሊም ኢተርፈ፡ ምነ ርዝቅ ኖሰን እት እዴህን እብል ሀለ ነኦርእየን። ኻሱሰን ሰብ ጀራዲን ገብአየ ምንገብእ ሀይ ፈርያተን እንዴ ትነፈዕን ምን ቅሩብ ነኦርእየን” ትቤ።

ወራት አክዶት ነዳፊት ድዋር ወእብ ፍንቲይ መትነፈዕ ሸቅቅ



አሰይደ ከሕሰ መሐሪ

ዱቅሪ መዝ ሀይአት ዐቦት መንበር ምንመ ኢኮን፡ እትለ አድረሶት ገበይ መትነፈዕ ሸቅቅ ለሸቅል ምን ቅሩብ ለአምራሁ። ከረ መእለውየ ወተኾንደዕ ምነ ሰኒ ጋይሳት ለሀላየ ዐዶታት ምዴርየት ዐዲ ቀዴሕ ክምተን ሀይ ተአፍህም።

አሰይደ ከሕሰ እብ ቲሉ፡ ምህሮ ዐቦት መንበር ሸቅሉ ቀሊል ኢኮን፡ ግዴቱ እት ሰን ገቢል ሀይ ዐባይተ፡ ምናተ ምነ ናይ በዲሩ እት ልበርድ መጽኦ ሀሌ። መሻሬዕ ልትረሰም ኢሀለ። ምን አመረ ለሚዛንየት ተሐጭር ትገብእ፡ እብ ቅድረትን እብ ንኢሸ ንኢሸ ምን እንሸቄ ለተቅደር ዐቦት መንበር ለእሉ ንሐዘ ሀሌን እብ መልሃይን እግል ንብጽሐ ወቀደር። እት ክል ምዴርየት ሐት-ሐቲ ይመማት ምንመ ሀላየ፡ እት ዐዶታት ለሀይአት ለዐለመተን ወካይል ሰበት ሀላየ ምን ጀህት ሰብ ምህነት መሕገዝ ኢሀለ። ንቅጣት ሀላየ፡ እግል እቲ ሀላየ ሀይአት ዐቦት መንበር ተዐልመን፡ ህተን እግል ምስለን ነብረ ለዐልመ። እብሊ ዝላም እሊ ለልትሐዘ ሀለ ምህሮ እግል አሰሐባብ ለትከሬዕ አለቡ። ለምህም ለሸቅል ክም ለአተላሌ መትጸጋምቲ።

እት ደንገበ አሰይደ ከሕሰ መንፈዐት መገጎ አድሐነት ክሉ አዳም ፍህሙ ሀሌ፡ እት ክሉ ገቢል እግል ለአብጽሓሁ ላኪን ለተአሰትህል ሰዳይት እግል ትግበእ እለን ትላኬት። እማት የም እብ ሐዲስ ክም ትከለቅናቲ፡ ዕጩሪ እግል ንእሬ ዓጻትን ትፈንደቅ ዐለት፡ ዕንታትን ተናን ለዓውሮ ዐለ፡ ልባሰን እብ ተውነቲ ምንገብእ ወለተሃልክ ክድመቲ እት መቅጠንን ልትሃተክ ዐለ። አዜ ላኪን ምን ክሉ እሊ እንዴ አባሬን ጀበትን እንዴ ተኬን ምን ሐቲ ምግላይን እንዴ ኢነኦሪይም ሸቅልን ነኦገዴ ሀሌን ሰበት ልብላኑ፡ እለ አነን እለ እብ እህትማም ዐቢ እግል ትረኤ እትፋኔ ሀሌኮ” እት ትብል ሊካህ ቀደመት።





ሐምድ እድረስ ዐዋቱ

ለዲብ ሄለል ሰብተምበር 2018፡ እብ ካትብ ምናድል ሀይሌስላሴ ወልዱ ለትኩተብ ክታብ፡ ሐምድ እድረስ ዐዋቱ ምንቲ፡ ታሪክ ሐያቱ ዕቢያቱ፡ ፍርስነቱ ውበዕድ ለሸፊሕ ጽበጥ ፋግር እቱ ዐለ። ከምን ጽበጥለ ክታብ ምን ምዕራፍ አርበዕ 10^ይ ክፋል ልተላሊ፡

መተርጎማይት፡ ዓሽ ዐሰማን

ወዲቅ ጣግዮት ደውደው

ሰላብ ሕያይ ክም በዝሐ፡ ሕኩመት ፈርሀት በይኣተ። እብሊ ህዬ፡ እንግሊዝ እግል ትትሐረክ አንበተት። አወላይ ሀይፈ ህዬ ሐምድ ቱ። ምን በዲሩ ምን ደውደው ሰላሕ ሰበት ነስኦ ሕኩመት ትነግንግ እቱ ዐለት። ደውደው ሞሉ ኢቀሰነ እቱ።

አምዕል ሐቲ ሐቀለ ነድ ኦቢያት ደበር፡ አሮት ሻውሽ ለመርሐም 15 ዐስከራ፡ ምን እሎም ለ10 ሱዳንዩን ለተርፈው ህዬ ዮሰፍ ደምባይ ለልትበህል ወድ ዐድ ለብኡቶም እግል ታዩኖት ወስለለ ምን አንቶሬ ትበገሰው። ለመርሐም ዐለ ሻውሽ ሻጥር ዐለ። ዲበ አካናት ለለኦፈርህ ክም በጽሐው በሰር ባሰረ። ሰልፍ ለጽዋር ወሴፋ ለራፍዐት እንሰ ከም ተሐልፍ ወደዩ። ምስለ ህዬ ሰብኦ ልባሰ ሽዑብ ለለብሰው ዐሳክሩ። እሎም እንዴ ገይሶ ዐለው ዲበ ከረ ሐምድ ለዐለው እቱ ድዋራት ብያኩንዲ ዲብ አፍኩርባይ ከም በጽሐው፡ ሻውሽ ለሽዑብ እንዴ ፈንተ ዲብ አሮት ዕሃል ከም ልዓርፎ ወለዐሳክር እንዴ ትፈንጠረው ለደዋይሕ ከም ራቅሶ ወደ።

ኩሉ ለሐረካት ምን ከረ ሐምድ ሕሶዕ የዐለ። ምን ረዩም ሰብደሐን መሰሎ ዐለው ከኢትሽከዝም ዲኢኮን ልርእምዎ ዐለው። ሐምድ ህዬ ጊሰምዎ ቡን ሶም ምን ጉበኦ ትሰኦሎም” ቤለ። ወለፍ ለሶም ልግብኦ ወለኦለሶም ሰሶዕ ለጉበኦ ጀማዐቱ እንዴ ኢፈርሆ፡ ጊሰምዎ። ዲሶም ክም በጽሐው ላኪን ለኢሰኦው እብ ማን ልግባእ ወገለብ ለክፍ ጉበኦ። ሀርበው፡ እብ ድግንጋጽ ለእለ ከይዶ እንዴ ኢደሉ ገጸም ሐር ዲብ ጀማዐቶም ሰዐው። ሰከይ አክል ሽፍተ ለአምሩ አለቡ! ለሆመ አሰርም።

ለአሰዕምዎ ለዐለው ዐሳክር ወለርሀሶ ምናም ለዐለው ሽፈቲት ባካት ከረ ሐምድ ቀርበው። ለክፍ ክል ዶል ሐምድ ለኣነብቲ። እንዴ ፈንተ እግል ልዝበጥ አንበተ። ሐምድ እግል ልዝበጥ ምን ኢጉበኦ እግል ለኣትፋርህ ኢለክፍ። ላመ መልህያው እተ-ክምሰልሁ። ተማም ሰበት ሻወጠም ብዝሐም ዐሳክር ትዋደቀው። ምናም ህዬ አሮት አማሬ ወዐለ ትዮት ለልትበህል ወድ ዐጅ-ጅሚል ጉራሽ ሌጠ ትቀተለ።

እተ ወክድ ለሀይ ለከሳር ብዝሕት ለጀሬት እቶም ዐሳክር፡ ብሰር ተማም ከም ትነፍዐው እቶም ፈሀመው። ለሸፈቲት እብ ዓኒ ዲብ ክልኤ ትከፈለው። ገሌ

እብ ሰያሰት እትህቡሳም እንዴ ጸንሐው ለሀርበው ወገሌ እንዴ ሐልፈው ሳትር ጸብጣም ለጸንሐው ለአመስሎ ዐለው።

እንዴ ረአውነ እምበል መቃወሙት ከም ሀርበው ምኒን መዐነውየት ወዲነ። ዐሬሶም፡ ጸበጦም ዲብ እንብል አሰርም ሰዒነ ከዐሬናሆም። ሰከዮም እትፍኩርነ ዐለ። እት ደንጎበ ላኪን ዐጃይብቱ! ኢትትክህል ከሳር እንዴ ረፍዐነ ምን አቅበልን ዲብ ሽረክ ሐምድ ከም ትከሬነ አመርነ። ለሕብዓም ዐለው ልትሐብዎ እት ህለው፡ ለእንዴ ሐልፈው ሳትር ጸብጣም ለዐለው ከረ ሐምድ እብ ጥለግ ገደር አፍገረው ምኒነ። ምስለ ሱዳንዩን አርብዐት ዲብ ሕነ ፈገርነ። ሰለሰ ሞተው ወሰማን ጅራሕ ክቡድ ጉበኦ እቶም።

ለሐርብ አሰሶሕ አንበተ አሰክ አርድ መሴ አተላለ። ለዶል ለሀ ደውደው ሰድፈት ዲብ ብያኩንዲ እብ ሸቅል ጋይሰ ዐለ። ህቱመ ዘብጥ ህለ ከም ሰምዐ፡ ለእለ ነስኦ እንዴ ነስኦ እግል ልርዳእ ዲበ ሐርብ አተ። ቅብላት ሕድ ዲብ ልትሓረሶ ጸንሐው፤ ከም ትሓበረ እቶም ለሐርብ ትደቀብ። እት ደንጎበ ህዬ ዲብ ተምሰልየት ትበደለ። ሐምድ ወቅብላቱ ዕንዱቅ ደውደው ቀበሊት እንዴ ጉበኦው እት ሕድ እብ ዕየር ጉበኦው። ከም ክልኦት ሰብ ንዋይ ለምን ቅብላት ልትሀራሀር እብ ዕየር ምን ሕድ ሐበት ኢሐድገው።

ሐምድ እግል ደውደው ክርንቱ እንዴ ወቀለ’ ዮም ሐልፈተክ! ዮም ኢትማጽኦነ ምን ጉበኦ አምዕል ሓሪት ኢንትማጽኦ። እምክ የኣክሸበተክ ኣነ እግል ኣክሸበኩቱ! ዐሬኒ! ዲብ ልብል፡ ሳትሩ ጸብጥ ለዐለ ደውደው፡ አሰኩት ያሓምድ! ብላዲፋል ፋኪን! ዲብ ልብል ልትሄረር ዐለ። ልብል ዮሰፍ ደምባይ።

ለሰምዓቱ ትበህለ እግል ሊብለ ለቀድር ዲኢኮን እብ አማን ክልኢቶም ምንቅብላት ሕድ ሰምዖ እግል ልትበህል ኢልትቀደር። ለተምሰልየት አማን እግል ተምሰል ናይለ ክልኦት ለዐስከሪ ደለ እበ ዐለው አሮት ናይ መሰኡሊኖም ህግዩ ወዕየር ሰምዐነ ልብሎ ዲብ ህለው ሌጣ ቱ። ዐሳክር ደውደው ከም ከረ ዩሰፍ ደምባይ መ እተክምሰልሁ። ፍንጌ ክልኢቶም ማይ ለዐለ እቱ ምሓዝ ዐለ። ሐምድ ምን ማይ እንዴ ሬመ ምን መያህመው ዲብ ጀሀት አባይ ቃርብ ዐለ። ደለ ምን ዐሳክር ሸበ ዲብ ረኣሱ ሸውጡ ወዲበ አካን እንዴ ጉበኦ ዕየሩ ለኣተላሌ።

ደውደው፡ ዶል ከእብ ሚ ህግዩ ልብለ ዐለ እግል ተእመኑ እበ ኢትቀድር



“ ያ ሓ ም ድ ! ያ ሓ ም ድ ! ሳ ክ ት ኢትትዓየር ኣነ መንባክ ከም ኣነ ኣምር! ልብል። አው ህቱ ዐረብ ለሓብር ዐለ አውለ እንግሊዝ ለልፍህም ሻጊ ምስሎ ዐለው በህለት ቱ። ለትበህለት ለደግሞ ሱዳንዩን ዐሳክር።

ሐምድ ክርን ደውደው ከም ሰምዐ፡ “እሊ ሐሳይ እበዩ እንዴ ጉበኦ ልትሃጌ ሀለ።” ቤለ ከእግል ለኣትንሰዩ አንበተ። አካኩመ ኣመረዩ። እንዴ ለአጫላቄ ምኑ ዐለ ዲብ አካን ፋድየት ከም ፈግረ ረኣሱ እግል ልሸውጥ ለለክፈየ ጣግዮቱ እንዴ ዘብጠ አውደቀዩ። ደውደው እንዴ ደንገጸ ዲብ ሐቲ አቅሹነ ዲብ ምድር ለትዳነን ቅሰለት ዳልየት ትሸርቤ። እባሁ ህዬ እብ ዐሳክሩ ወኖሱ ምን መዐረከት ፈግረ። ከረ ሐምድ ሰብ-ሰልሐም ውበዕዶም እንዴ ትሓበረው 50-60 ጉበኦ ታኻላምበ ተዐደው።

እብ ሰበት ጣግዮት ደውደው ሐምድ እብ ዓኒ እግል ለኣትፋሁ እንዴ ዘብጠዩ ከም አውደቀዩ ብዙሕ ልትበህል ዐለ። ዲበ አካን ለሐድረ ዐሰማን ሎንጊ ላኪን ክእነ ኢኮን ልብል።

ሰልፍ ደውደው ረዩም ሰበት ዐለ፡ ጠልገት እግል ተዐርዩ ምንመ ትቀድር ህግዩ እግል ትበጽሐ ኢትቀድር። ሐር ህዬ ሐምድ በዐል ቀዋፊት ሰበት ዐለ ጀማዐቱ ለወዴቱመ ህቱ ከመ ወደዩ ልትሀደግ ጉበኦ ዲኢኮን፤ ጣግዮት ለአውደቀ ሐምድ እንዴ ኢጉበኦ አናቱ። ሻሁድ ብዬ ምስልዬ ለዐለ አሰናይ ህያቡ። ሐምድመ ርኤኒ። ለዶል ለሀ ሐጋይ ዐለ።

መቃወሙት እግል

መትፋዋሽ ሐምድ

ሐምድ ምን ሸር ትመጽእ ምኑ አለቡ። ርሐ ለፈቱመ ኢኮን። እብ ርሐ መትሃጋይ፡ ርሐ አትዓባይ ወመትፋዋሽ ላኪን አደብ እኩይ ዲብ እንቱ ዐለ እቱ። ኣነ እለ ወዴኮ ወእለ አውቄኮ ለቤለዩ ብዙሕ ዐለ። ቡን፡ ሐሊብ፡ ነብራ፡ ማል እቡ እግለ መጽአው ፈተቹ፡ ልግባእ ወለለአመሩ፡ ክእነ ወዴነ፡ ጀማዐቹ ፈዳብያም ወፋርሳም ቶም ሕኔት ልብል፡ ርሐ ሌጠ ፈቅድ

ለልብሎ ብዝሓም ቶም። ድግም ሐቆ አንበተት ርሐ ሌጠ ሰናቄ። ምን ኣመራ፡ ክሉ እንዴ ወክለ ጉበኦ ክእነ ለቤለ። ሐት ሐቲ ዶል ህግዩ ሸፈቲት ከምሰልሃተ።

ጣግዮት ደውደው እንዴ ትዘበጠት ከም ወድቀት፡ ከም ሐደሰ ዐቢ ናይ ሐምድ ትዳገም ወልትሀደግ እበ ዐለት። ኖሱ ሐምድ እግል ደውደው እግል ለኣትፋርህ ወለሐዝሩ፡ ወእግል ለኣደንግጹ እንዴ ቤላቱ ዲኢኮን ጠልገት ሐምድ ዲብ ምድር ኢትትከሬ፡ እግል ልቅተሉ ምን ለሐዘ፡ ሐምድ ግድ ለበትክ እናሰቱ ማሚ፡ አርድ ወአሸወጠዩ እንዴ ትበህለ ተሀደገ እቡ። “መትፋዋሽ ሐምድ ህዬ ክልነ እንፈትዩ የዐልነ። አሰክ ደንጎቤ እምበል አርት ሸዐቢ ፡ ምኒነ እንዴ ደግነ ትከልጥ ህሌለ ለቤለ የዐለ”። ልብል እድረስ ማሕሙድ።

ዲብ ሀይምደሚ ነብር ለዐለ በዐል አጣል፡ ሕዳረባይ ወድ ቤት ዐወድ፡ ክል ዶል ዲበ ሸፈቲት ገይሰ ዐለ። ዲብ ለሐልፎ ሐቆ ረኣዮም ሐሊብ ወሰገ ነስኦ ከእቡ መጽኦም ከምሰሎም ልትሃጀክ ዐለ። ህጅክ ሸፈቲት ነፍሱ ትፈትየ ዐለት። ኢትሓበረ እቶም ዲኢኮን መዋዲቶም ክሉ ርሐ ተሐልፋ እቱ ዐለት። መሐመድ አሕመድ ልትበህል። አምዕል ሐቲ እለ መሐመድ አሕመድ ለልትበህል፡ ሐምድ እበ ወደዩ ውበዕዳም እበ ወደው ከም ናዩ ዲብ ልትሃጌ እቡ ከም ሰምዐዩ፡ ሐምድ ሐቆ ሐርቀ ከም ኢልምሕክ ዲብ ለአምር፡ ሰብ ቀቀለ፡ ህግዩ ዑራት እንዴ ኢትጉበኦ፡ እብ ደኣል እንዴ አተመሰለ ሰምዐ እንዴ ኢልሰኤ ትሃገዩ።

ሰማዕ ሐምድ፡ እንተ ክል ዶል ክእነ ወዴነ፡ ክእነ ፈዐልኮ ትብል ምን እሎም ክሕለት ለመሰል መናዱቅ ጸውራም ለህለው መልህያምክ አሮት ፋርስ ምን ተሐጋላቱ። ሱረት፡ እመነት፡ ዕጩት እንዴ ጉበኦው ትረአውክ? ወለ ኢተአምኖም ምን ጉበኦነቱ፡ ወለ ክሎም ሐምቃም ምን ጉበኦው ቱ። እለ ላቱ ጋብኦት ኢኮን ወጸንሐት፡ ህግዩ በድል፡ ንዋዩ ለትዘመታመ ሕኔት ሸፈቲት ዘምተውኒ ልብል ሐምድ ዘምቲኒ ልብል። ለአምዕል ለሀ ሐምድ ኢሐርቀ። አይወ አማንነቱ፡ ምናተ መልህያምዬ ለወደው ክመ ኣነ ለወዴነሁ ወኣናመ ለወዴነሁ ክመ ህቶም ለወደው ቱ ክሉ ሐቲ ቱ። ሀደፍነ አሮት ቱ። ምስል ነጻርር፡ ምስል ነህጅም፡ ምስል እንገሚ ሰበት ጉበኦነ ወዴኮ ምን እብልመ ኢኣክፈኦት ቤለ ከበልሰ እቱ።

መሐመድ አሕመድ እበ በሊሰ ሰበት የኣግነዐ፡ ወላመ ሰብሰ ሰበት ቆቀለዩ፡ ክመ እለ ትቤ ምንመ ጉበኦ ፈኮም ላቱ እግል ትድገሙ ዋጅብ ቱ። ዝያድ ክሉ እንታቱ ውላድክ እግል ተኣትናይቶም ለብከ። ኢመትሃጋይ እብ ወቀዮም አምዕል ሐቲ እግል ለኣክሰፋካቱ። ግሱይ ዲብ እንተ ማይ ለለኣሰቱክ፡

ነብረ ለለሀይቡክ፡ ህቶም ቶም፡ ሰበት እለ፡ እግል ትትሐሽም ሐሽሞም። እብ ርሕክ ሌጠ ትትሃጌ እት ህሊክ ሕናመ ነሐሚክ. . . ቤለ እንዴ ደግነ። ሐምድ እንዴ ኢበልሰ ረኣሱ ነክነክ ከኣዝመ።

ዲብ ልትሃገው ሰገ እንክትፍ ዐልነ። በዲርናመ ለኣነ! ኣነ! ለልብል ጠባዬዕ ናይ ሐምድ እንፈትዩ ሰበት የዐልነ፡ ለእናሰ ለህግያሁ ክልነ ፈቲናህ። ነኣተንሰዩ ወእብ ሕሶዕ ነኣቀምቱ ዐልነ። እንዴ ልብ ኢከሬ ዲብ እንርእዮ ከም የዐልነ አመት ከተፎት ሰጋነ እንወዴ። ኣዜመ ንትወለብ፡ ዶል ልርኤነ ልብ ኢከሬነ እግል ነኣምሰል ህጅክ እንፈትሕ፡ እብ ከብድነ ላቱ ለእናሰ ዲብ ልብነ ለዐለት ሰበት አፍገረ ሐሊብ ሰቲነ።

ሐርብ አቡ ሰለል

ሐቆ ሐርብ ብያኪንዲ ብዙሕ ትገሰው። ለተለዮም ኢዐለ። ለቀሰሶም ቱለልመ የዐለ። ገሌ ዲብ ባካት ደገጊቶም፡ ግሌ ህዬ ዲብ ንዋዮም ጌሰው። ተቅሪባን ትፈንጠረው። “እምበል ሸቅል” ልብሎ ህቶም አወርሐት ዲብ ለአንጎት ሓሰፈው። ኖሶም ሰብ ቆቀለው። ዕርፍ ከም በዝሐት እቶም እግል ሸቅል አቡ ሰለል ጌሰው። ለሸቅል አቅሰኖት መርባት ቱ። ዲበ መደት ለሀ ዐሰማን ሐጃጅ እብ አምሩ ኩሉ አዳም እት አሮ ዕቅብ ለአበጥር፡ ልትዓደሉ አለቡ ኣምር እንዴ ትበህለ ልትሀደግ ሰበ ትዐለ፡ እበ ፍክሮም ሐበት ምን ኣምር ለትተርፍ ምኑ አለቡ ዓልም ዐለ።

እሊ እናሰ እሊ ከረ ሐምድ ዶል ልርኤ ነጌብ እንዴ ጌሰ ዲብ አቁርደት ተለፎን ወዴ። ዲብ ነጌብ መርከዝ ፖሊሰ ዐለ። ህቱ ተለፎን ዶል ወዴ ሸርሸር ጠበሸ ለትብለ ሐቲ ቱ። ለዶል ለሀ ጣኢረት ሐርብ ሸርሸር ልቡለ ዐለው። እንዴ መጽኦት ትለክፍ እቶም ሰበት ዐለት ለሐርግግ እተ ዐለው።

ቀደም እለ ዐሰማን ሐጃጅ ዲብ ረኣሰ ጀሳሰት፡ እሎም ዲን ለአለሶም ኩፋር ቶም”ሕራዶም ምን በልዑ?” ዲብ ልብል ሰምዐት ለኣኪ ሰበት ዐለ፡ መደት ሐቲ ሐምድ ሳጅት ዐለ። እብሊ ህግዩ ሌጠ ህቱመ ክምሰልሆም ካፍር እግል ልግባእ እንዴ ቤለው። ሰገ ብዙሕ አዳለው እግሉ ከ “እሊ ሰገ እንዴ ከትፈካሁ በይንክ ኢበልዐካሁ ምን ጉበኦ፡ ኢተሐደሰክ”ቤለዩ። እብ ቀሰብ እብልዑ ዐለ። ለዶል ለሀ ለእለ ትበህለ ምን ኢወዴ ርሐ ወኢተርፈት እግሉ ልብል።

ዐሰማን ሐጃጅ እንዴ ትጃዝ ሚዶል ልትአደብ!፡ ሐቆ ለሃመ ሓለቶም እንዴ ታብዐ ሕኩመት ለአሰኦል እግሎም ዐለ። እብ ዐዱ እንዴ ሐልፈው ኢኮን መዐደይ ዐዱመ እቡ ሓልፋም ዲብ እንቶም ለሐድጎም የዐለ። ሰኒ ወኣማን ጸግቤ። እብሊመ ካልእ ዶል ሰጅነው። ለዶል ለሃመ ለረድአው ሰበት ረክቤ፡ ቅራመት ሌጠ ደፍዐ።



እንዴት ኢትዮጵያ ኢትዮጵያ

ከአፍሪካ አስመንጃም ውላጃ አውኪራም፤ ናይ እለ ሰነት እለ ምህሮ አንበትክም፤ እንበተት በኪተት ትግበእ እግልክም እንሻለ። ክምሰል ናይ በዲርክም ተረዶ፤ ሕፊዞ ወፊድቦ። ጃእዛት ጃቅፎ ወምደርሲንክም ወዋልዴንክም አሸንኖ ውላጃ አውኪራም።

ሳሌሕ የም ዓመት ዲብ 6ይ ፈሰል ክም ሐልፈ። ጅማዐት ሐቲ ሐዋኒት ሰበት መክረቱ፤ ይእደርስ እንዴት ቤል ዋልዴት ወሰነት ዲብ ደኪለት አስመንጃ። 6ይ ፈሰል ሰኔ ክቡድ ቱ ወክሉ ለድሩስ እብ እንግሊዝ ቱ ሐቆ ኢትሃጌ

ቀደሙ እሊ ሳድስ ፈሰል እንዴት ደረሰክም ኢኮን ለዲብ ሳብዕ ወምኑ ወለዐል ለበጽሐክም፤ ወለ ለሳድስ ፈሰል የም ዓመት ኩብደ ቤለወ ከክእኒ ልትረበሽ ዐለ ሳሌሕ፤ ወለ ሳሌሕ ምን ክሉ እሊ አጀኒትለ ደጋነ ለሐምቅ ከርሐ ኢደም፤ እለ ሳቱ ድቦተ ገደ አቦትክም። ሐሬ ህዩ ‘መን ክም እንተ እግል አምረኩ ምን ትታሌ አስእለኒ’ ለልብል ብሂል ህለ ማሚ፤ ነፈር ሐዋን ወበዐል አክደድስ በዲርክም ትራዮሙ። ለይህሌት ሓጀት እንዴት አትካበደ ለአትካብር እበ ወአዳም ለአባዴ ምሰሉ። እንዴት ኢትትአከዶ



ወኢበለሰከ ህዩ ምደርሲን እግል ልዛብጠካቱ ቤለወ። መስኪናይ ሳሌሕ፤ ልቡ እንዴት ትሰለበ እሊ ሳድስ ፈሰል ልቡሉ እንብት የኦብሉ ቤሌ። ዋልዴት እብ እንክሮም ወሕነ እብ እንክርነ ዲብ ነአፍህም ወእት እንደክል። ገድም እትንቡታሙ ህሌ።

ወለቱዬ ማክራም ኢልግብኦ! ሐዋን በዲሩመ ሰኔት ኢገሚ፤ ርሐ ለአባዴ ወጸሩ። እንትም ህዩ አሰናይ ረቢ ሰዴክም እቡ ከአንበተ። ግረ እላመ እግል ኢልሕመቅ ከኢልትሽወሽር ሰደይት ትርድት ለሐዘ ምንክም። ክም ቀልል እግሉ ወክም ፈትዩ ውደዉ። ሐሬ ህዩ

ወሰኔ እንዴት ኢትኦተንትኖ፤ ደለ ትብህለት ምሰለ ኢትትገለዉ። በዴ ለርኤኩሙ መልሀይክም ህዩ ምክሮ ወዲብ ዐድል ብሎሱ። አዜ ህዩ ዲብ ትትሀደግ ሳምዐተ ለአነ ድግም እግል እዳግም እግልክም። እለ ድግም እለ ምሰል እለ ሓሉት ናይ ሳሌሕ ትትማሰል፤ ከእዘን ክረወ እግልዬ።

ዲብ ምሮት ምድር ዐድ ሰኔ ርዘቅት ወጋምለት ዐለት። እለ ዐድ እብ ንዋዩ ምን ገብእ ወእብ ግርህ ጽግብት ወስሚት ነብረት። አክዶራተ ብዞሕ ሰበት ዐለ ብዝሓም ዜምተት ወሽፈቲት

ልትህንን ዐለዉ።

አምዕል ሐቲ አምሱይ ምድር ሸባባት ናይለ ዐድ ምን ከደን እንዴት ለዐይር፤ ለዐድ ከበር መክሩህ ትለከፈ ዲቡ። እሊ ከበር እሊ፤ ምሮት ኢልሐድግ ሸፍታይ ክምሰል አተ ዲብ ወእሰልፍ እግል ሸባባት ክምሰል ቃትል፤ እብ ሐለቱ አዳም ክምሰል ኢቀድሩ አዳም ዲብ ሕድ ጩጭ ወደ። ለሸባባት ከወኒሆም ወአሰዩፎም እንዴት ነሰአው ምሰለ ኢልትቀድር ለልትብህል ሸፍታይ እግል ልትብኦሶ ትዳለዉ። ለሸፍታይ እብ እንክሩ እብ ጀፈር ምክሮት ናይለ ዐድ እንዴት አብሀደ እብ አትፋርሆት ወተሀዲዳት ምድር መንክለ። አዳም ክሉ አንሱ ወተብዐቱ ዲብ ሕድ ትለክለከ።

ለቴለል ክእነ እት እንቱ ለሸባባት እብ ሱሰት ናይለ ሸፍታይ ሰበት ፈርሀው እንዴት ቀርቦ ለሸፍታይ ለጋብህ ኢትረከበ። አክለ ቀርቦም ምሮት ከአሰክ ከደን ትጠለቀ። አዳም እብ ፈርሀት ሰሩ እብ ንዋዩ ለሀርብ ወሰሩ መምተለካቱ እንዴት ሐድግ እብ አጀኒቱ ሌጠ ከደን ፈግረ። እት ክእነ ሓሉት እት ህለዉ፤ ምሮት ምድር ረዩም ጋይሰ ለዐለ ሻብ ናይለ ዐድ መጽኡ። ዲብ ምግብለ ዐድ ክምሰል በጽሐ፤ ለሸባባት ክሉም እት ለሀርቦ ረአዮም። ለቴለል ክምሰል ኢተአመረ እግሉ እግል ምሮት ሻብ እንዴት ተሀልፈተ ሸብ አበለዩ። ለሻብ ላተ “ተልቀኒ፤ ትዘመትኩ ጅን መጽኤኩ ዐድነ አብደየ!” እት ልብል ሃፈተ።

ለምን ክደን ዔረ ሻብ፤ እግሉ ለሀርብ ለዐለ ሻብ እንዴት ኢጠልቁ። “ሚ ዐይነት ሸፍታይ ቱ እሊ፤ ሚ ወዴኩም ወሚ ልብል ህለ?” እት ልብል ትሰአለዩ።

“ለሸፍታይ አክል ገደር ቱ፤ እብ ሐሉት ክሉ ረአሱ ቀድሩ አለቡ። አነ ለሰምክወ ለገብኦ ዐስር ሐቲ አጫቤዕ እደይ ለቡ ነፈር ቀትሉ ክምሰል ህለ አስአለዉኒ?”

“እላቱ! እለ ምን ገብእ፤ አብሸርክ ሐቲ ኢትገብእ! ዲብ እለ ዐድነ ዐስር-ሐቲ ጭብዕት ለቡ ነፈር አለቡ። ለሸፍታይ ህዩ ልምጽእ እግልከ፤ መጽኦመ ምን ገብእ ሕነ ዐስር-ሐቲ ጭብዕት አለብክ እንብሉ፤ ቤለዩ። እንዴት አትለ እግሉ ለትፋርህ ለዐለ ሸፍታይ፤ “የህ ወድ-ሱብ፤ ሕነ ዐስር-ሐቲ ጭብዕት አለብክ፤ ጭብዕትነ በዲር ቀደምክ ለመጽኦ ነፈር ቀርጩዩ።” ቤለዩ። ለሸፍታይ እሊ ክምሰል ሰምዐ ለእበ ለአትፋርህ ዐለ ክጠት ሰበት ተአመረት ተአከደ፤ እንዴት ኢበልስ እቶም ገጽ ሐር አቅበለ ምኖም ልትብህል።

ሰበት እሊ፤ ቤለ ቤለው ወአትራዛቅ አክረቱ እንዴት ኢደሌከ ሐቆ ሀደግከ እቡ እት መደረት እግል ልክሬ ክምሰል ቀድር እግል ነአምር ወጅብ።

አጥዐሚቶ

ሐቲ አምዕል አብ ወወልዱ እንዴት ልትሃጀኮ ወልተልሀው ክእነ ትብህለው።

አብ፤ ካልድ ወልዬ አነ ዕምርዬ ከም ሰነት ገብእ መሰለክ?

ጅነ፤ አነ ደብ ቀደምምከ ውሉድ ሚ አነ ከዕምርክ አምር

አብ፤ እንዴት ቀደም፤ ከም ገብእ መሰለክ?

ጅነ፤ 30 ሰነት ገብእ መሰለኒ

አብ፤ እንዴት ሐቲ ወሰክ ዲብ ጣይአቡክ አምሩ ቅሩብ ህሌክ

ጅነ፤ አይወ! አመርክወ፤ እበ ግረ ናይለ በሕ ሐቲ ሐቆ ወሰኮ 301

ሰነት ዋዲ ህሌክ ደብ

አብ፤ እላቱ እንዴት ረቢ ልቅበለ ምንከ ዕምር ጥዉል ምን ለአብዩ፤

ምናተ 301 ሰነት ገድም ቅዋዕ ምን ኢረክበን።

አምሳላትን ነአምር

አምሳላት ትግረይት እግለ ትፈናተ አሰባብ ወመናሰባት ፈግር። እሊ አምሳላት እሊ እግል ሂበት ሰእየት፤ ሰብር፤ ሕድርኖት፤ ግውርነት፤ ህያብ ወንሰእ፤ ጽጎት፤ መሕገዝ፤ ፈራሰት፤ ሕውኑ ግርመት ወጀላል፤ ግድዐት ወበደን... ወእሉ ለመሰል ልትብህል። እግል የም እለን እግል መሐገዝ ለትመሰለየ ንግነሕ፤

- ሕጉዝ በሰርታይ ገብእ
- ሕጉዝ ማይ ግናዘቱ ወርድ
- ሕጉዝ ጭዊት ለአተንሴ
- ሕጉዝ ግድእት ካይድ
- ሕጉዝ እት አንገቡ ርጉዝ
- ሕጉዝ ዐምሳት ለሀዴ

ለትፈናተ መዕሉማት እግል አውኪር

- በሐር ማይተት አዳም እግል ትግሌ ኢትቀድር። ክሉ ረአሰ ጩወት ሰበት ቱ፤ ለገብኦት ሓጀት ዲብ ረአሰ ሰለል ትብል።
- ሀንደገት ክልብ ምን ናይ አዳም እብ 40 ዶል ትሸፍግ
- ለሐፍነት ኮከብ (ፕላኔት) ሸኑስ እት ትገብእ፤ ደረጃት ሐፋነተ 464 ዲግሪ ሰንቲግራድ ትገብእ፤
- ሐንገል ወድ አዳም 2% ምን ከባደት ገርብክ ለጸብጥ እት ገብእ፤ 15% ምን ሸቅል ናይ ልብ ጠልብ። እሊ ህዩ፤ 20% ምን አክሰጅን ወ25% ግሉትዝ ለአትሐዘዩ።
- እት ፍንጌ ወሬሕ ወምድር ለህሌት መሳፈት 238,857 ማይልስ አው ህዩ፤ 384,392 ኪሎ ምትር ትገብእ።



ፕላኔት ሸኑስ



A map of Eritrea and its surrounding regions. Eritrea is shown in white, bordered by Sudan to the west, Saudi Arabia to the north, Yemen to the east, and Ethiopia to the south. The Red Sea is to the north and east, and the Gulf of Aden is to the south. Major cities in Eritrea are marked with black dots: Nakfa, Keren, Massawa, Asmara, and Anseba. The Kobar Sink is labeled in the south. The map includes a scale bar at the bottom left showing 0, 75, and 150 miles. A copyright notice at the bottom right reads '©2001 Encyclopædia Britannica, Inc.'.

ኤረትሮፖ ምን መካሪት እንዴ
አስተብዳክ፡ ዲብሊ እግል አሮቤ
አሰፖ ወአፍሪቀ ለለአትራክብ
ዲብ ሰሞሕል በሐር ናይሊ ፊይሐ
ማያይ ክፋል በሐር ቀላሕ ሰበት
ህሌት እግል መትዐዳይ ወትጃረት
ክምሰሁመ ዕልማይ በሐሰ
ወድራሳት ፍቲት ወድዮ።

A close-up photograph of a tiger resting on the ground. The tiger is looking directly at the camera with a calm expression. Its orange fur is marked with dark stripes, and its white underbelly is visible. The background is dark and out of focus, suggesting a natural habitat.

ሰበት ህለው እሊ እግል ኖሱ
ለልኦትናይት ወስያሐት ዐድነ ገጽ
ቀደም ለዋሌ ቱ። ክምሰለ ቀር ዐቢ
ለም ገረዊት (Greater kudu)
ሀቡይ፡ ባርህ ለሕብሩ ሐሻይል
ጸሊም ሕብር ሕቀት ለቡ አክላብ
ከደን አናራቃይ ደመሚት ከደን፡
ገሌ ምነ ወሀበት ዐድነ ላቶም



ክምሰል ከረ ሹብህ ጀዚረት ቡሪ
መሰለሰ ርክን ድዋራት ገልፀሎ -
ጢያ - ወበደ የም አለቦም ሔዋናት
ከደን ክምሰል ከረ ቀናዲፍ፡ ዔጥር፡

ኤረትሮፕ ክምለል ተሐረረት ህዩ ዝያደት ዲብ በዘሐ መጽአው፡ ዐረዊት ሕብር ለቡ ከረኙ ዲብ ክለ ኤረትሮፕ ለህለ ጅንስ ሐዋን እት ጉበእ ብዕድ ክምለል ጉማሬ፡ ዘራፍ፡ ሐረሽ ወህመመሂትመ ክፋል

ርዝቅ ኤረትሮፖ ቱ። እሊ ለተሀደገ ሐዋናት እግል ልትፈረጅ ለመጸኣ ቤጽሐት፡ እተ እለ ህለው ኦነን ምን ቅሩብ እሊ ለትበህለ ሐዋናት እግል ልትፈረጅ ቀድሮ። ሐዋናት ከደን ዲብ ሕዱድ ድዋራት ሰበት ህለው እሊ ህዩ ክምሰል ፍንቲይ በክት ኤረትሮፖ እግል ልትሀደግ ቀድሮ። እሊ እብ ዶልዶሉ ዲብ ለአሰሐብብ መጽእ ለህለ ሐዋናት ከደን እብ ፈድለ ዲብ ዐድነ ለህሌት መሰከብት ወዲብ ሽዑብ ለልትረኤ እብ ሰበት ሐዋናት ለህለ ዓቅቢት ቱ። ሐዋናትነ ዝያደት ጀላብ እግል ልትባዘከ ወልትፋሬ ህዩ እብ ደረጀት ወጠን ለጉበእ ወለልትቀተር ኣክደር ድዋራት ወድበፅ ዝያደት ለለኣትናይ ቱ።

ምን ሰሩር አው ላቅሰ መንሰህ ቤት አብርሄ እግል ንርኤ፡ ሰሩር
ለትፈትዩ አው ሰመይ ወውጁህ ሓጥር ወበዐል ገጽ፤ ጸጋይ ወወሹር እብ
ዓመት ክሉ ለፈትዩ ነፈር ዶል መይት እግሉ ለልትሐሌ ሕላይ፡ ሰሩር
ልትበህል። እት ገሌ ምድርመ ሸምበር ልትበህል።

ከምነ እት ዘብን ቅዱም ልትሸምበር ለዐለ፡ ሰሩረት እሲት ግዳር ወድ ለሌማን እግል ብእስ ለሰረታ ተ። ብእስ እብ ሕማም ሞት ወሐር እይለ ፍቲሁ እግል ኣሓሁ እንዶ ፈቅዶት ክእነ ሰረቱ፡-

ለግለሰብ ደምበሌል ቅዱት ጸልማ ተሰላሳተ
ክም ቅዱት ትትሐሰሰ ዲብኪ ህለ ወንጌለ
እምበል ለፅንዳቀት አምዕል ወላሊ ሸጌ እለ
ጠለምቶ ኢኮኒ ትጸበሕ ወለት ሙቲለ
ለጸግበ ምን ሰዐር ወለአሰትዮ ማይ ዓለ
እት ሰልፍ ሰባኪት ተ ለበርቅ ተለው ክም ቤለ
ሰረ ወሰሙር ሰዐር ለእብር ልፍቲ እለ።



ባርንቶ ክምሰል ሐልፈው ላተ ድርሆይ ሸውዋ ሰኑብ ሰበት ዐንዩ ዲብ ክርሲ እንዴ አግህመ ቀሚተት ጥዕም እግል ለአንፍር ስድ ቤሉ፡ ምሮ ምነ እተ ቀበትለ ባስ ሳፍር ለዐለት እሲት ለነፍረ ጂክ እግለ መኪነት ረበሸ፡ ድማን ወድገለብ እት ልሻወር ወበዐልቱ ጽቦጡ እዩ ዲብ ትብል ለኡዳም ሰሩ እብ ሰሓቃት በረቲዕ እት ገብእ ወሰሩመ ክረፍ ክረፍ እትልብል ጨፎ ክምሰል ቤሉ፡ ድርሆይ ሚ መዕረካት ቀንጸት እንዴ ቤለ ምነ ሰካቡ ፈግ ወደ። ሰኒ ሓርቅ ዲብ እንቱ ህዩ “ሚ እሲት ተ እለ የሀው፡ እሊ ባስ ኡዳምቱ ሚ ደወርህ?” ቤለ ወእባህ፡ ለቀደም እለ እት ሕሊል ሕዳይ ለሳፊደቱ እለ ለትመሰል ምሽክለት ፈቅደ።

ድርሆይ ወመለሆዩ አምዕል
ሐቲ ነወሎም ሐድ ሰበት ዐለ
ወመዋዒድ እጃዘቶም ሰበት ተመ
እቶም መኪነት እንዴ ኢልታከው
ምን ነቅፈ አሰክ አፍዐበት እብ
እገር ትበገሰው። ስጋደት ስጋድ
እንዴ ትከረው ባካት ቢያን ክምሰል
በጸሐው። ምን ግረ ዎር ግንራን
እት ልትፈተት ዐረዮም። እዴሆም
ክምሰል ረፍዐው እሉ። በዋረ
እሎም ወአሰክ አፍዐበት ጸዐኹም።
ለጉንድራት ሐቲ ተሻሺት ደወርህ
እጅርቱ ዐለት። ምን ደወርህ
ርጉሕ ሰበት ዐለ ከረ ድርሆይ
ምሽብሺበት ክምሰል ረከበው እተ
ቅርፍጭ እንዴ ቤለው። ምግሳዮም

የላብወው። ድርሆይ ሰኒ ፈትራን ሰበት ዐለ መደቲት ክምሰል ጌሰው ዲበ ምቅርፋጩ ቀመቲት እግል ለአንፍር ስድ ቤለ ምነ እት ባካት እዝኑ ለዐለ ቀፈዝ (ጋብዩ) ምር ባልዕ ሳቲ ጂክ “ኩኩ...ክ። ኩኩ...ክ” እት ልብል ለክምሰል ወህበት ራክበ ለዐለ ቀመቲት ጥዕም አንፈረ ምኑ። ድርሆይ ለሰኩበ ሰበት ነፍረ እቱ እብ ወጀዕ ረአሰ ሽዐረ።

እሊ ወክድ እሊ ሓርቅ ዲብ እንቱ “ሚ ሓለት ተ እሊ አዳም ምስል ደወርህ ሳፍር፡ እሊ ዲርሆ እሊ እንዴ ጸበጥኮ ምን እለክፎ ሚ ትብል እሊ እሲት?” ክምስል ቤለ ለምስሉ ዐለ መለሆ፣ ዲብ ልስሐቅ፡ “ዎር ሚ ወደ መስለኩ ዲርሆ ናይ ዎውሮ ነፈር ክምስል ረበሸ፣ ለነፈር እግለ ዐውለ ዲርሆ ትሰአለ፣ ዐውሉ ክምስል አሰአለ፣ ዐውሉ እንዴ ደፍዐ እሉ እበ ሽግክ ፌተተት፣ የለ እንታመ ዐውሉ እንዴ ደፍዐክ እበ ሽግክ ልከፋ እግል ተዓርፍ ቤለ።

ለእብ ቀሀር ነድድ ለዐለ ድርሆይ ምን ቀሀሩ እንዴ አቅበለ ዲብ ልሰሐቅ፡ “ዐውል ዲርሆ ወረኩብኩ፡ ጣይ ሐኩ እብ አገርይ ሞ ሳፊርኩ። አዜ ህይ ትም በሎ ወእሲትኩም ቅበሮ ቤለው ትም ብሂል ለአሰትህል ዲርሆመ ክምሰልዬ ወክምሰልከ ሰላዲሁ ዳኖሶ ሰበት ህላቱ ዐለኬፋ ለአዝን ለህለ።” እት ልብል በልሰ እሉ።

ቶቶላሌ...

ሸባብ



3^ይ ክፍል

ሳልም ላተ ለጸብጠ ለዐለ ስለል ሻም ፈረጀት አቅበሎት ምን ምስተሐል መሰለት እቲ። ዐድ ህመድ እግል አምዔላት ፈንጨጋር እንዴ አተዋም ምን ሕድ እት ልትነዋነው ጸንሐው። ሐቆ ሳምን አክባሮም ለዳገመ እግሉ ምርኮብ ለቴለል ምን ቅሩብ እግል ልድለዩ አሰቡሕ ምድር ሸንኩት ዐድ ህመድ እንዴ ቀንዶ ምስል ህመድ እኩባም፡ ስሉማም ሐቆ ትበሀለው “ስምዐኒ ህመድ እንተ ወሳልም ሚ አከይ መቅሬሕ ሐሰለ እትኩም ሚቲ እሊ አክባር ለልዳገም እነ ሀለ”፡ እብ ሰኣል ዲብ አብ ሳልም ህመድ አትሐጨረ። አብ-ሳልም ህመድ፡ ምርኮብ ብክር ቤቶም ወምዕባዩ ሰበት ገብአ ምን ንእሹ ዲብ ለሐሸሙ ወህግያሁ እት ሰምዕ ዓቢቲ፡ አዜማ ለሓለት እግል ልዳገም እሉ “ጠይ ሐካ ምርኮብ እሊ ቀም እሊ እብ እኪት ኢረይሕ ወእብ ሰኔት፡ ሕነ እግል ጽምዱ ልትወተድ ወቤቱ እግል ንርኤ ምን ተምኔነ ኑረ ወለትካ ከም ውላድ ርሕምን እንፈትዩ እለ ህዴ ከሰም ዋልዴንክ ርፈዕ እንቤሉ ለኪደዩ ክዩድ ኖሰክ አምሩ ህሌክ፡ ሐርመ ህዩ ምን አዋልድ ሓሎታትካ ለእለ ትትከዩር እግል ንህዴ እክ እንቤሉ፡ እሊ ክሉ እንዴ ሰረ ዮመቲ ወለት ዩቲመት አቡህ ኢነአምር ወሓለ ሎሂ ሕሊል ምተሐትነ ዲብ ምነ ኢእትካሬ ብህልነ ህሉ፡ ረቢ እት ኬር ልህደዩ በል፡ እንታመ ገድም ሰምዴክ ምን ገብእ ምከሩ እት ኢኮ ለህመድ እተ እሲት እለ ትፈራረ እሉ ላተ ኬን ቦለ ሌጠ” እት ልብል ህመድ ምን ሐዲሰ በርደ ወሐፍን።

ምርኮብ እግል ክለ ለህዋዩ ህመድ እብ እንትበህ ለአተንሰዩ ሐቆ ጸንሐ፡ እበ ክርፍት ሞረቲ ምድር እት ሸራዋዋ “አዜ እዝን ክሬ እዩ ህመድ፡ እሲት ወብእሰ ወሕፍረት ወበዐለ ልብሎ ሰብ ዐድኩ፡ ሳልም ህዩ ተሐይሰ እዩ ሐቆ ቤሉ፡ ተሐይሰ እዩ ምን በዐላ ተ፡ ሕነ ኑረ ኢህደ እንዴ እንቤ እት እሲት ብዕደት ኢንትፈረር እክ እንብሉ፡ ሐሬ ህዩ ሳልም ሰነትነ ኢኮ ወህግያነ ኢሰምዕ፡ ሕኔት ምስል ሳልም ፈዐለት ወተርከት እንብል ምስልክ ምን ንትጋሚ ወለምራዱ ምን ነአተምም እሉ ለሐይሰ መስሊኒ አናዲ” ሐቆ ቤለዩ ምርኮብ፡ ህመድ “ሐቸኢ ሐብሬ ኢደሐን ! እንታመ እሉ ተሌ ህሌክ፡ ኢፋልካ ትትበለሰ ብለሰ ወለትምን እንዴ እንቤ እግል ንሕዜያ ቱ ምርኮብ ኢትብለ እለ ላቲ ጣይ ሐካ ብሩዩ ግበእ”። እት ልብል ህመድ ለረአይ ምርኮብ አትዓባብ፡ ምርኮብ ህድእ እንዴ ቤለ “ህመድ አዳም ምን እመን ኢልትወለድ ወምን ዕጨይ ምን አዳም ሌጠ ልትወለድ፡ ዐዳ ህዩ ወረይም ወቀርብ እተ መስከሮም እንዴ ጊሰነ ነሐዝዮም

ብዙሕ ኢትሻቀል ወኢትሕረቅ” ሐቆ ቤለዩ፡ ህመድ መደቲት አስተንተነ ወሐሬ “ከገድም እንተ ተዐቤ ኢኮ ሐቆ ተሐይሰ ትቤ አናመ ጎማትክ ኢእካልፍ ደሐን ቱ” እንዴ ቤለ ህመድም ሼጣን ዐወዘ ከዲብ ሐቲ ጎማት ዋፈቀው። ሳልም ላተ ገበዩ ኢጠለቀ ምሴ ወፈጅር ምምሳዩ ወምጽባሐ ምስል ፈረጀት እት ቤት ዐድ ናፍዕ ዐለት።

ፈጅረት፡ ህመድ እግል ሳልም ወልዱ እት ለአድሄ “ሳልም! ምሳልም ንዐ ረቢ እት ኬር ልህዴክ፡ እብሊ ቀደምዬ ትገሰ” እንዴ ቤለ እት ቀደሙ ክምስል አትገሰዩ “አወል ረቢ እትኬር ልህዴክ ወልህዴክ፡ ከም ቀዳመ ህሌት ሚቡ ውላድ አዜ ጎማትኩም እት እዴኩም ተ ኢኮን፡ በዲር ከም ነሲሐት ነሲሐናክ ወአዜ



ሕኔት ምስልክ ንትናተል እተ ጎማትክ እግል ንትሌክ ቱ። ለእሲት ለእለ ትቤ ኖሰነ እግል ንሕዝዩ እኮቲ፡ እንተ በሰ እድንያክ እተ ኢትሐውን ፈድብ ወልዩ። እለ ጋሪት እለ ህዩ ሰከብ ምነ ወዐፌ ምኒነ ሳምን ታመት ምን ሕድ እት ንትዋኔ ጸንሓም ዐልኩ። ሐቆ ቤለዩ፡ ሳልም ምራዱ ከምስል ተመ ማሰል እቲ እት እንቱ “ይብ እንቱም ዐፋ ምንዩ ሓረቅኩም” ቤለ ከእብ ሰዕመት ዲብ እዴ አቡሁ አግሀመ።

ሳልም ፈርሐቲ መትከሃል እግሉ ሰበት አቤት ፈረጀት እግል ልባሸር አሰክ ዐድ ናፍዕ አሳደረ። ሳልም ግዳር ቤት ዐድ ናፍዕ ከምስል በጽሐ እትለ ድዋር ጽጌዕ እንዴ ቤለ እግለ ባብ እብ ቅሩታዩ ከርከሐዩ “ከው. ከው.ከው”፡ ምናተ ሳምዓይ ሰበት ሐግሎ፡ አዜመ ምን ሐዲሰ ከርከሐዩ። ለእተ ከርሰለ ቤት እብ ሕንጽሮ ምስል አግርበት ቤተ ዳግም ለዐለት ፈረጀት ክርንለ ልትከርከሕ ለዐለ ባብ ከንሼሎሆም እት እዝነ ሰበት በጽሐት ባብ እግል ትክሰት ሄራረ እት ተአሻፍግ ፈግረት፡ እግለ ባብለ ድዋር ክሰት ሐቆ አበለት ፈረጀት፡ እሊ ኢኮ ለእት ልበ ሰክብ እቡ ወትፈዝዕ ለዐለት ሳልም እት ቀደመ ትንካር ጋብእ ሬኤቲ፡ ፈረጀት እብ

ምን መልካቱ

ፈርሐት “አሀለን ያሳልም” እንዴ ትቤ እት ወራዱ ሐቆ ሰረት እሉ፡ ዲብ ምግሳይ እግል ልትሃጀኮ አሰክ ቤት እት መርሐ አቲት እቡ።

ፈረጀት ወሳልም እተ ሳሎን ቀብል ቀብል ሐቆ ትገሰው እብ ዕን ፋትዩት አድሕድ ትሐዋረረው። ሳልም ብዙሕ እንዴ ኢልተአከር ለእት ልቡ ውንቅ ትብል ለዐለት ፈርሐቲ እግል ልካፍለ ሰበት ሸፍን፡ “ፈረጀት ዮም ብሻራት እበ ማጽእኪ ህሌኮ” ቤለዩ። “እብ ሰኔት ልባሸሩክ ናይሚ ብሸራት ተ ሳልም ሐቶ” ትቤ ከትሰኣለት ፈረጀት። “ዋልዳዬ ዮም ሼጣን እንዴ ዓወዘ “ እሲት እግል ንሕዜ አሰክ ዐድ ናፍዕ እግል ኒጊሰ ቱ ዲብ እሊ ዐምዔላት” እንዴ ልብል ሓድጉ ህሌኮ”፡ ቤላዩ ሳልም እብ ህዋዩ አቡሁ እት ልተራጀግ።

ፈረጀት ላተ ለትታዕሸሙ ለዐለት መሰተቅበል ሐያት ክሉ ለበጽሐቲ ሰበት መሰለ እቲ፡ መደቲት ረሐት እዴህ ሕቃብለ ከብብ አሸዱፈ እንዴ ወዴተ ሐቆ አስተንተነት ወሐሰበት ዲብ ሳልም ወለበት ከ “ሳልም አነ ወእንተ ክልኦት አልባዎም ጸዐደ ወምን ክሉ ደሚርም ለልትፋተው ሰብ ሻም ሰበት ሕክ፡ ረቢ ኖሱ ምራድነ እግል ለአትምም እናቲ፡ ወለ እት ፍንጌነ እንዴ አተ ለፈናቱ ወፈንዋር ረቢ ኖሱ ልርእዩ ህለ”፡ እንዴ ትቤ እግለ ትንብር እት ለዐለት ሐያት ይትምን፡ ምስለ ትተምንዩ ለዐለት መሰተቅበል ሐቆ አትዋዩነት ዕንታተ እብ ዕንቤዕ ትማለኣ። ነፍሰ እግል ብካይ ሰብሰበት፡ ፈረጀት ብካዩ እግል ትሕበዕ እት አፍ ልብ ሳልም አግሀመት። ሳልምመ ለሓለት ፈረጀት ሐቆ ረአ ህቲመ እት ቆሪናህ ለኢተአመረ ዌለ ሕሳባት ትሸመመ። ለምን ዕንታት ፈረጀት ትትካዴ ለዐለት ዕንቤዕ ይትምን ወሻም እግለ ሓምል መለትሐ እንዴ ሻገገት ለጸውረተ ለዐለት ርሳለተ እግል ተአብጽሕ ዲብ አፍ ልብ ሳልም ዓረፈት። ዓቤ! ርሳለት ልብ አሰክ ልብ፡ ፈረጀት ወሳልም እግል መደት ሐዳት ሳንያት ለገብእ ወቅት፡ ሕድ እንዴ ኢነቅዎ ክምስል ጸንሐው፡ ሳልም እግለ ምን እማቲ እንዴ ትፈንተ እብ ረአሰ ሐጀቦ ለአድረዋሬ ለዐለ ሸቢባ ዲብ መስከቡ እት ባልሱ እብ ደሚርም መደቲት ሐቆ ትሃጀከው። አዜመ ባብ ከንሼሎሆም ምን ሐዲሰ ትከርከሐ፡ ፈረጀት ምነ ታውቀት እቲ ለዐለት ሕሳባት ሐንገለ እንዴ ረፍዐት፡ እንብዐ እት ተአዘፍፍ አሰክለ ባብ ሄረረት።

ፈረጀት፡ ባብለ ድዋር ከምስል ከሰተት ዎርት ወድ ሕለቶም ላቲ ጅኔታይ ንኡሽ፡ ወምስል ወሰኮቡ ሐህ እት ልተልሄ ተአምሩ ለዐለት፡ እብ ድንጋጽ ዲብ ለዐንበድብድ “ፈረጀት፡ ፈረጀት ወሰኮቡ ሐኪ ምን መኪነት እንዴ ወድቀ ሐንገሉ ደም ፈሸሸ አበለ ወአዜ ሕክምን ንሰው እቡ” ክምስል ቤለዩ መስኪነት ፈረጀት አዜመ ተአትዋይነ ለዐለት ፈርሐት እብ ገሀይ ትወረሰት። እበ እብ አመተ ኢአመረት ሰምዑ ለዐለት ከበር ሕፋን እንዴ ትፈጀኦት “ዎይ አኑ፡ ጨበል ገበኦኮ ወጨበል ከደንኑ፡

ዎርታይ ለዲቡ እደፍእ ዐልኮ ቱ”እት ትብል ምድር እብ መውዲታት በለሰቲ።

ሳልም እብ አመተ ኢለአምር ለእምበል ሰሓቅ ወድግም እግል መውዲ ለኢልተምንዩ ክርን ፈረጀት ቃሎተ ምድር አትሀንቀልቀለት እቡ፡ እብ ድጋጽ ምን ቤት ዲብ ልሰዔ እንዴ ፈግረ “ሚቲ፡ ሚቲ ፈረጀት፡ ሚ ሐሰለት፡ ሚ ጀሬት እትኪ? ምንመ ቤለ ሰኣሉ በሊሰ ኢረክበ እሉ። ፈረጀት፡ ሳልም እት ምብጣሩ እንዴ ሐድገቲ እት ትውዴ እበ አሰክ ሕክምን ለጋደሰ ሻርዕ እብ ሰዐይ ሰዐይ ጠለቀት። ሳልም ለሐለት ኢትፈሀመት እግሉ፡ ዲብ አካኑ ክምስል ግንዳይ ይቡሰ እት ተክል ሐቆ ተርፈ፡ እተ ጀኔታይ ንኡሽ (መብጽሓይሉ ከበር) እንዴ ትወለበ እት ለአፋዝዝ “ሚ ቴልካህ እንቲ፡ ሚ ከበር ሁቡህ” እንዴ ልብል ሐቆ አትፈርሀዩ ለጅኔታይ ላተ እንዴ ኢፈርሀህ ለእግል ፈረጀት ለሀበዩ ከበር እብ ሐት-ሐቲ ደግመዩ እሉ።

እሊ ወክድ እሊ ሳልምመ እብ ድንጋጽ እት ለአርዐዴ “ለሐውለ

ወለቅወተ፡ ዩረቢ እብ ቀልል ክረዩ፡ ፈረጀት፡ ፈረጀት” እት ልብል ህቲመ እብ ሰዐይ አሰር ፈረጀት ለሻርዕ ነሰኣ። ፈረጀት ወሳልም አሰር ሕድ እት ከይዶ እብለ ባብለ ሕክምን እንዴ አተው አሰክ አብያትለ እሰዓፍ አገርበተው። ፈረጀት ቀደም ሳልም እት ተሀራብዋ እበ ባብ ክምስል አብሀዘት፡ ዶክተር ዐብደለ እግለ ክም ጤባይ ሰጡር ለዐለ ሐንገል ወሰኮቡ እት ለዓሽብ፡ ወለ እተ ሕክምን ለዐለው ሴድዩት ነርሰመ ለለኦትሐዜ አላት ሐከሞት ወፋቮታት እግል ለትቃርቦ ኬን ወእንሰር እት ልብሎ ጸንሐው፡ ፈረጀት ለሓላት ከም ረኤት እብ ድንጋጽ እት ተአርዐዴ ዲብለ ዐራት እብ ዕንቅራሩ እምበል ረአይ ወሰመዕ ምዱድ ለዐለ ወሰኮቡ ሐህ እት ረአሱ ሀርበጠት ምኖም። ዶክተር ዐብደለ ገበይ ሰበት ክልኦቲ “አብሸርኪ! ድሐን ህሉ፡ እግል ልሕዩቲ፡” “ንዐ ምን ሰምከ በረ አትገሰዩ” ቤላ እበ ዲብ እዴሁ ጸብጡ ለዐለ መቀሰ እግል ሳልም ዲብ ለአሸር።

ኬትባይ ዑመር እድረሰ ሳልሕ

ትተላሌ.....

ሻብ ዴቅባይ ወዌርሳይ አማነት ቱ !!!

ሻብ ዴቅባይ አማነት ቱ ምን አንብልመ ሐሰት ክም አኮን ክሉ ለለአምረ አማንተ ሸባብን ምን አበን ጀደን ለጸንሐ እሎም ወፍንቲይ ታሪክ ክም ክምስል ሰርገለው ወሰርግሎ ክምስልህለው ክሉ ለለአምረ ሳብተት አማንተ። ወድ አዳም ህዩ ዲብ እዲነ አግል ልንበር ገብአ ምንገብኡ። ታሪክ ሐጠር፡ ፈራሰት፡ ወኤማን ለትሐዝዩ። አግልሚ እንቤ ምንገብኡ ህዩ ታሪክ ዲብ ሐያት ወድ አዳም ምህም ሰብትቲ። ሸባብን ለምን አሰል ጸንሐም ታሪክ ሽዕዩም ወወጠኖም ዝያደት ክሉ እንዴ ወርሰው እግል ልትሐፈዞ እቲ ወጅብ። እሎም ዮም ለህለው መንደሊታትነ አት ውርሰ ዶርም ሚ መሰል ዶል እንብል፡ እሊ ሰኣል እሊ ቀደም ኩሉ እግል ዋዴን፡ ሙደረሲን፡ ዐባዩ ወእብ ዓመት ህዩ እግል ክሉ መጅተመዕ ከሰሰ። እሊ ለእንቤቡ ህዩ ለሸባን ዳኢመን እት አዋራፎም ለመድ ወዓዳት እቡ ሰበት ገደሶ ናይነ ምክር ወሐብሬ ተትሐዝዮም። ሕነ ሐቆ ይሐበርናሆም ምን ገበይ ካዋዩት እግል ለአቅብሎ ይቀድር። መሰለን ብዙሕ ዓዳት ወለመድ ሰበት ሀለ ዕንቶም እግሉ እግል ትግነሕ ትቀድር። እሎም መንደሊታት እሎም ምን ጽባብሐም እንዴ ይጀሉ ምክር ወሐብሬ ትትሐዜ ምኒነ ህሌት። ፈሀም ሸባብ ሐቆ ትወቀለ ወዜደ ህዩ ክሉ ለመጅተመዕ ፋህም ህለ በህለት ቲ። ክሎም ዲብ ዕምር ንእሽ ለህለው መንደሊታት እት መድረሰት ክሉ እብ ሰበት ወጠኖም ለህለ ታሪክ ልግበእ ወዓዳት እግል ልድሮሱ ለወጅቦምቲ። እሊ እግላ ሻብብ ፋዛንቶም ለደቅብ፡ ፋዝዕ ሻብ ህዩ ሚርሓይ ወጠኑ ወሸዕቡ ቲ። ከአለ ገብኦት ምንገብኡ ክሊነ እግል ተቀድም ወዐቡ ሸባብን እምበል ሕላሌ እግል ንክደም ወጅብ።

መርሐለት ተዋዊር

እለ ዲብ ህሌነ መርሐለት፡ ተዋዊር በህለት ተሕዋል እንብል አትህሌነ ምን ዋውር ተዋልል አሰክ ራትዕ ተዋልል፡ ተቅዩር ምን አንባቶት ብንዩት ተሐቲት አሰክ መርሐለት አንታጅ፡ ወጃቀፎት አርዛቅ፡ እብ ሐጫር ህዋዩ አሴራር፡ አሰክለ ፈርያት ተዐበትነ ወለህበትነ ለእንረክብ እተ መርሐለት በህለትቲ። አዜ ንትዐዴ እተ ለህሌነ መርሐለት ተቅዩር ክምተ እግል ነኣምር ለአስትህል። ህተ ህዩ ሰኒ ምህም መርሐት ተ። ከአለ መርሐለት እለ ብዙሕ ዝሕርታተ ጸብጠት እግልነ ህሌት። እብ መጅብ እሊ ህዩ ህታመ ናዩ ተሐድያት ክም ብዲብ ክሉ ለለአምረ አማንተ። ከአለ ዝሕርታት አሊመ ክም መስል እግል ንፍሀሙ ገብኦነ ምንገብኡ፡ ለእግለ ሐለፍነ መርሐለት ሚ ከም መስል መትዘካር ለትሀዜ። ክሊነ ክመ እንፈቅዱ፡ አትሊ ለሐልፈ ዝያድ ርቡዕ ዘበን፡ ሕሸመት ሰያደትነ እግል ይትትከዩድ ለገብኦ መጸገም እበ እንክር ዎርት አት ዐቂብ ሰያደት ወጠን፡ ወአሳሰ ዐቦት እቅትሳድ እግል ንብኔ ለወዴናሁ ወቀይ እብ ቀሎ ቀሎ ለልትረኤ ኢኮን። እለ መርሐለት እለ ህዩ ብዙሕ ከህላት ወሰብር ጠልበት ምኒነ። እብ ፈድል እሊ ወቀይ ወሰሙድ እሊ ህዩ ዐድነ እግል ተሐዋዋ ቀድረት። እሊ ህዩ እብ ፈድል ወቀይ ሸባብ እብ ፍንቲይ ወገቢል ኤረትርዩ ህዩ እብ ዓመት ቲ። እብሊ ህዩ ምነ እግል ረኪብ ሕርዩት ለወዴናሁ ግድለ ለልደቀብ ግድለ መደፋዐት ወዐማር ወጠን ልደቀብ። እሊ ምን በሕ እንዴ ትገበነነ ዐባይ መርሐለት እግል ንብጸሕ ለቀደርነ እብ ፈድለ ሸባብ ኤረትርዩ እምበል ሕላሌ ለወደዉ ወለአቅቀዉ ወቀይ ቲ።

ልግብ

ረቢ በሊስ ሀበ

ሐቲ እሴት እት ሸቅል እተ ዐለት እቲ ወቅት ወለተ እንዴ ሐመት ሐዝ እቡ ሀለይ ትብል ክም ሀሌት ለለሐብር ተሌፎን ትከበተት። ለሸቅል እንዴ አዝመት ምኑ አስክ ቤት እት ተአቀብል እትገበየ ደወ ሐዝ እግለ ወለተ እግል ትንሰእ ለዐረብየተ እንዴ አብጠረተ እት ምሮት ፈርማሲ ሸክፈት። ለደወ እንዴ ትዛቤት አስክለ ዐረብየተ ዶል አቅበለት። እንዴ ኢትደሌ ምፍታሕ ለዐረብየት እት ቀበተ ክም ደብአቲ አመረት። ህተ አግለ እት ቤት ሕምት ለሀሌት ወለተ ትረድእ ሰበት ዐለት ሰኒ ሻፍገት ዐለት። ሚ ክም ትወዴ ትቀወ እተ። ከተለፎን አስክ ዐድ እንዴ ወዴት እግለ ኒኢሸት ሕተ ለጋር ደግመት እለ። ለእለ ትወዴ ቃውየት ክም ሀሌት አስአለተ ለኒኢሸት ሕተ ህዬ ወለተ ለሓለተ ሰኒ ወአማን ክም ትኬለመት ደግመት እለ። ወገሌ ሐጺናይ መሀንጦጠል ካቦት እንዴ ሐዜት ለባብ እግል ትፍቱሐ ክም ብእተ አስአለተ።

ለእሴት እትለ ባካት ዶል አቅመተት ሓጺናይ መንጠልጠሊ ካቦት ሰኒ ገዳም ወሰጉር ረኡት። እሊ ሓጺናይ ምን አመረ ቀደም እለ ክም እለ ናየ ምሽክለት ለሳደፊቱ ነፈር ባብለ ዐረብቱ እንዴ ፈትሐ እቡ ለለክፊዩ እግል ልግበእ ቀድር። ከአስክለ ሐጺናይ ለእሉ ራክበት ዐለት እንዴ አቅመተት። “አነ አዜ እሊ ሓጺናይ እብ ከፎ እትነፈሶ እቡ አምረት ይህሌኮ” ትቤ። ወረኣሰ አስክ ሰመ እንዴ አንቀሶረረቲ። ረቢ ገሌ ሰዳይት እግል ሊዴ እለ ጠልበት። እት ቀበት ሐምሰ ደጊገት ሐቲ ገዳመት ወጭፋልቅት ዐረብየት ምነ ምተሐቲህ ጠበሸ ቴለት። ምሮት ሸክሙ ወናሱ እብ ጭገር ገጹ ግራሁ ለመሰል ወረኣሱ እብ ዕመቲት ባልየት ዓሽቡ ለዐለ እናሰ ሰውገ ዐለ። ለእሴት ቅሩብ ሕሰብ እንዴ አበለት። “ረብል አልዓለሚን እሊ እግል ሰዳይቼ ለነዳእካሁ ነፈር ቱ ገብእ?” ትቤ ምስል ረሐ እት ትተራቀም። ምናተ ሰኒ ፍክርት እት እንተ። ብዘሕ ሐምዴህ እግል ረቢህ ወዴት። ለእናሰ ምነ ዐረብቱ እንዴ ትከረ ገሌ ሰዳይቱ ተሐዜ ምን ተህሌ ትሰእለየ። ሰኒ ሰዳይትከ ሐዜ። ወለቼ ሕምት ህሌት ከእግለ ገሌ ሰራይ እትዛቤ እለ ለዐርብየት እንዴ አብጠርኮ እት ፋርማሸየት ጊሰኩ። ወልብ እንዴ ይእከሬ ለመፍቱሕዬ እተ ቀብተለ ዐረብየት ደብአክም። አዜ እንተ እሊ ሓጺናይ እቡ ለዐረብየቼ ትፈትሐ እግልዬ ማሚ? ቴለቲ።

ሸክ ኢትወደይ ቤለየ ወለሐጺናይ እንዴ ትከበተ ምኑ። እተ ረኣሰለ ዐረብየት ዐርገ። ወእት ቀበት ሐዳት ሰሞኒ ለዐረብየት ፈትሐየ። እዴለ እናሰ እንዴ ጸብጠት እብ ፈርሐት ዕንታተ አናቤዕ እት ልክዔ። “ሐምዴዬ ትብጸሐክ እንተ እናሰ ሰኒ ሙብሩክ ይእንተ ገብእ። ቴለቲ።

ለእናሰ ህዬ። የሀይ እሴት አነ እናሰ ሙብሩክ ይኣኑ። ምን ሰጅን ዮም አዜታይ ፋግር ህሌኩ። ዐረብየት እንዴ ሰረቅኮ ሕቡሰ ዐልኮ ወምን ሰጅን አዜ ቀደም ሐቲ ሳዐት ፋግር ህሌኮ ቤልየ።

ለእሴት ህዬ አዜመ ምን ሐዲሰ ለእዴሁ እንዴ ጨቅመት። ወአናቤዕ ጀለም እት ተአብል ክርንተ እንዴ ወቀለት። ሐምዴ ትብጸሐክ ረቢ አልዓለሚን ምን ክሉ ናሱ ምሮት በዐል ወቀይ ምን ነደእክ እቼ” ቴለት።

ተርጀመት መሰል

“ምስል ንኡሽ ኢትምከር፡ ወምስል ከልብ ኢትትሐበዕ”

ምስል ንኡሽ ለትመክረ እተ ዶሉ ለአፈሽለ እትኩ። መሰለን ምን ብዕዳም እት ተሕቤዕ ሰንዐቲት እንዴ ነስኣክ ምስሉ ትካፈልካህ እንከ እለ ብልዐ ወሐር ምሮትመ ኢተአእሰእል ቴልካህ ምን ገብእ ሰኒ ልብላኩ። ወሐር እንተ ህሙል እት እንተ እት ቀበት አዳም ምሮትመ እንዴ ኢልሰአለኡ። አነ ወፍላን ሓጀት ፍላን ክሉ ረእሱ ቃርባመ ይሕነ አው ኢነሰአናህ ልብሉም። ወእተ ዶል ለህ እንተ ትፈዳሕከ ወተአመርከ በህለት ቱ። ከህቱ እብ እኪት እንዴ ኢገብእ ለንእሹ ቱ አተበለዩተ። ከልብመ መሰኒ ወድ አደሚ ወፈታይ ሰኔቱ ቱ። ምናተ። ገሌ ተአፈርህ ጋሪት እንዴ ሳደፊተክ ምስል ከልብ ሐቆ ተሐበዕከ እት ምነ ለኢትፈግር መለገት ሌጠ ትትከሬ። በህለት ከልብ እብ እኪት እንዴ ኢገብእ። እብ ጠቢዐቱ ጋሻይ ጋር ረአ ምን ገብእ ሰበት ነቤሕ። ለምሕበዕክ ትትአመር እትከ ወእክረትከ ብቆት ትገብእ በህለት ቱ። ከዓመተን ለእለ ትወዴ ወተሐሰብ ክለ እብ እለ ለትናሱብ ገበይ እግል ቲደየ ብእትከ ወእለ ለሳረት ተ አክረተ ኢትሰኔ።

መዕሉመት

ሕብር ንሳልነ የም አለቡ አሻይር ናይ ሕማም ወዓፍየት ገርብ ሸፊሕ። እብሊ ሰቡብ ቱ ሓኪም እግል ልርእዩ ለጠልብ ምኒኑ። ክምን እብ ሕብር ንሳል ለነአምሩ አሻይር እለ ተሌ ንርኤ።
- ቢጫይ፣ ለንሳልነ ሕብር ቢጫይ ብዲቡ ምን ገብእ እለ አሻይር መትወቃል ንሰበት ሰፊር እት ደም ለአሸር።
- ጌረማኒ፣ ለሕብሩ ጌረማኒ ሐቆ ገብእ እለ ህዬ አሻረት ናይ ሕማም ልብ አውመ ጅሃዝ አተንፈሶት እግል ልግበእ ቀድር።
- ቀዬሕ፣ ሕብር ንሳል ቀዬሕ ዶል ገብእ እለ አሻረት ዓፍየት ክሉ ገርብ ለአክድ።
- ባህት፣ ሕብርለ ንሳል ባህት ዶል ገብእ ለነፈር ንቅሰ ናይ ደም በህለት (አኒምየ) ጸቡጥ ክም ሀለ ለሐብር።
- ጠበቀት ጸዕደ፣ ልንሳል ጠበቀት ጸዕደ ግልብብቱ ህሌት ምን ገብእ። ለነፈር ሐድ አውመ ምሽክለት ሓቀቆት ነብረ (ለመጮት ነብረ) ክም ሀለ እሉ ለአሸር።
- ረጅፈት መአርዓዳይ፣ ለንሳል ዶል ረጅፍ አውመ ለርርዐዔ። ተሰምም ጃሪ ክም ሀለ አውመ እትለ ዓሳብ ገሌ ዕጥል ጃሪ ክም ሀለ ለሐብር።

ዲብ ወቅት ሐጨር እት ሰርገል ለለአበጼሕ አብሳር

ብዝሓም አዳም እግለ እት ሸቅል ለሀለ እሎም ሃዳፍ። ገሌ መጅሁድ እንዴ ኢወዱ እብ ሸፋግ እት ወቅት ሐጨር እግል ለአትሙሙ ልትሳሰወው።

ብዚኔሰ 2 ኮሚኒቲ ለልትበህል ዌብ ሳይት። 11 አግቡይ ሸሕር፣ እበን እንዴ ትነፈዕከ እምበል መጅሁድ ወእት ሐጨር ወቅት እት ሰርገል ለለአበጼሕ አብሳር ቅዱም ሀሌ። ከእለን 11 አግቡይ እለን ተልየ ተን።

- ከልመት “ኢፋል”፣ ለእለን ብከ አውለውያት እንተ ናሰከ ሐድደን። ወእግል ብዕድ ነፈር ለእለ ገብአ ልግበእ አውለውያትከ እሰወን ክም ተን እግል ለሐድድ እግልከ በክት ኢተሀቡ።

- ዐውል ለበን ወራታት፣ ክል ዶል እተ ዐውል ወመንፈዐት ለብዲበን ነሻጣት እተን ረክዝ። ወእግለ እት ረዩም ወቅት እግል ትብጸሐን ለተሐዴ ሃዳፍ ለኢከድመ ወራታት ትራየመን ወምን ገበየን አውልጥ።

- ሰኩብ፣ እት ክል ምዕል ምን 7 – 8 ሳዐት ለገብእ ሐቅከ ምን ሰኩብ ሰኒ ዕቀብ። እሊ ህዬ እተ እት ሸቅልከ ዋድሆም ለህሌክ ሃዳፍ እቶም አክል ሕድ እግል ትረከዝ ዐባይ ሰዳይት ወዴ እግልከ።

- ሕጌ እግል አፍካርከ ግበእ፣ እግል ለለአትሓምቃከ አውመ መጸግምከ ወወቀይከ እግል ለለትናእሽ ለጀራርብ ጋራት ክል ዶል አምሸሽ ምን። ለእሉ ብከ አፍካር ወእግል ትብጸሐም ለተሐዜ ሃዳፍ ሕጌ ወድፋዕ ግበእ እሉም።

በህል እሙራም

- “እግለ እት እፈትዮም ወእከጅሎም ወሐሽጥም ለኬነዉኒ እግል እሳሚሕ ሸኑህ ህሌኮ።” (ደዮን ዋኮሰኪ)

- “ምሮት ነፈር ለገበይ ለብዕዳም ምስሉ ልትዓመሎ እበ እግል ልበድል ትሸንህ ምን ገብእ። እት ሰልፍ ለገበይ ለህቱ ምስል ርሐ ልትዓመል እበ እግል ልበድል ብእቲ። ወእግል ርሐ አክል ሕድ ወእብ አማን እብለ ተአሰታህል ደረጀት ርሐ ለፈቱ እበ ገበይ ሐቆ ኢለአምር። ሐሊት ፈተ ክም ተህሌ እሉ ለወዴ እበ ገበይመ ክሉ ረእሱ አለቡ።” (ኤሊፍ ሸፈቅ)

- “ዲብ እለ እዲነ ምነ መጢጠቱ እግል ለአሰእል ለኢቀድር ነፈር። ምነ መጢጠቱ ዶል ተአነግፋ ለተዐቤ ወተሐይሰ ወቀይ በታተን የሀሌ።” (ዩሰፍ ዜዳን)

ዝበድ

ዛዖታት

እዲነ ወእቤ ወፍቱ ክምእነ ሌጣ ተ፣ እንዴ ኢመጠዋከ ኢትትዓሬ። ወእንዴ ኢትጋጌገ ኢትትዐለም። ወእንዴ ኢፈሸልከ ኢትትዐወት። ወእንዴ ኢሐገልካመ ኢትረክብ።

- ለባዲ ወቅት ርከቡ፣ እትለ በዝሐ ወቅት እት ሚ ክም አብዴካሁ ለኢለአምር የም አለቡ በላሽ ለበዴ ወቅት ክም ሀለ ልት አመረከ። ከእብለ ምስምሰ እለ። እሊ ባዲ ለሀለ ወቅት እግል ትርከቡ ወተአምሩ ብእትኩ። ወሰቡብለ በዳሁመ እግል ትፍህሙ ለአትሐዜ።

- አግቡይ ነዘሞት፣ ወቅትከ ለትነዘም እቦም አግቡይ ወእብ ገበይ እሊ ዝሃም እሊ እግል ወቅትከ እብ ገበይ ንዝምት እት እሙር ወሕዱድ መጸግም ለተወዝፍ እበ ገሌ ፍንቱይ ተውቂታት ለሀሌ እግልከ።

- ሐሊትከ ዕቀብ፣ በጣርየት ሞባይል ዶል ለእለ ትትከለሰተ ምን ሸቅል ተማም እብ ተማም ትብጥር። ከእንታመ ለበጣርየትከ አስክ ትትከለሰ ወተማም ትብጥር ኢቲደየ። አክልመ እብ ተዐብ ሸዐርካተ ከአዲግ ምልኡ። ወለ እግል ሐጨር ወቅትመ ልግበእ ቀመት አንፍር ወዓርፍ።

- ዕድዋንከ አክል ሕድ አምሮም፣ ለእሉም ብከ ሃዳፍ

እግል ትጭቀም እተ ትትብገሰ እቱ ወቅት። ክል ዶል እግል ለዐንቅፋከ ለጃርቦ ዕድዋን ክም ሀለው እግልከ እግል ተአምር ቱ። እሉም ዕድዋን እሉም አዳም እግል ልግበእ ቀድሮ ወጋራት ወተየልል። ከአክል ሕድ አመርካሆም ምን ገብእ እብ ከፎ ክም ትትቃርሐም እግል ትፍህም ቱ።

- ነብረ ዑፊት፣ ነብረ ዑፊት ነስኣከ ምን ገብእ። ድህንከ ሳፊ እግል ልግበእ ትደምን እግልከ ወእግለ እቱ ፍሩር ህሌክ መጸግም ክመ ተአትሐዜ እግል ትሰርግሉ ትሰዴከ።

- ሐቲ ጋሪት ትከፈኩ፣ ዐቅልነ ሐቲ ጋሪት እተ ክም ለአወቂ እንዴ ገብአ ክሉቅ ቱ። እት ምሮት ወቅት እት ብዝሓት መጸግም እንዴ ከስኣካሁ ኢተሐምርገ።

- ለድዋርከ መትናይታይ ወደዩ፣ ለዲቡ ህሌክ እግል ሸቅልከ ለከሰሰ ድዋር እት ወቀይ ለለአትናይት ወእግል መዕጸም ክም ዳርክ ውደዩ። እሊ ህዬ እግል ሃዳፍከ ትጭቀም ሰነድ ዐቢ ገብእ እግልከ።

ጠዓሞ

ምሮት ቃዲ ምነ እት ወቅት ሐያት ሸቅሉ ለሳደፈዉ ጋራት እት ለሓኬ ክም እነ ደግመ። እተ እለን ሐክም ዐልኮ ገዳየ ሐቲ እምበል ምሮትመ ለቀልበኒ አውመ እት ቀደሚዬ ለበጥር የዐለ። ከእትሊ ክሉ ወቅት ለእት መሓክም ለአግዴኮሁ። ሐቲ ምዕል እግል ልቅለበኒ ለቀድረ ምሮት ነፈር ሌጠ ሳደፊኒ። ህቱ እት ቀድየት ናይ ምሮት በዐል ጃርዲን ክም ሻህድ እንዴ ገብእ ማጽእ ዐለ። ለእናሰ ለጃርዲን ኣካን ፍላን እንዴ ቤለ ለሕዱዱ ወእሊ ጃርዲን እሊ ናይ ፍላናይ ቱ እት ልብል ሸሃደቱ ቀደመ። አነ ህዬ ለጋር እት አትሳዕብ እቲ። እላቱ ከከላሰ ለጃርዲን ክም ዕጩት ሀለየ እቱ? ዕልበን አሰእለነ እቤሉ። እግል መደቲት ትም ቤለ። ወሐር። መንባነ ለቀዲ ምንመ ዲብ እለ መሕከመት ክም ቃዲ ሸቀ ክም ዋዲ ሀለ? እት ልብል ሰኣል ወጅሀ እቲ። አነ አክል እለን ወአክል እለን ሰናታት ዋዲ ሀለ እት እብል በለሰኮ እቲ። ህቱ ህዬ እተ ዶሉ፣ ከላሰ እለ ምን ገብእ ዕልብ እሊ እት ረኣሰከ ለሀለ ሰግፍ እቲ ለሀለ ዕጩይ ክም ክምቲ አሰእለነ ቤሌኒ። አነ ህዬ ሐቆ እለ ለአማን ምስልከ ህሌት እቢሎ ወለ ሸሃደቱ ትከበትክወ ቤል።

በህል


- ሰኔት ለኢለሐዜ ሚክራይ ሓሰድ፣ ለምክሩ እት ቀደም አዳም ዶል ለአሰእለካ ቱ ለተአምሩ።
- ዝያድ ፈተ ነብረ፣ ናይ አማን ፈተ ላተ ፈተ ይህሌት።
- ምን ቀዳሚቼ ለትፍንቴኒ ሓሪት ክሉ ረእሰ ይሐዝያ።
- ምሮትመ ለኢልርእየ ተጃረት። እግል በዕለ ክል ዶል ልዉቅ ቱ ወምን ዕን ሓሰድ ሕጃብ ትገብእ እሉ።
- ብአክትብት ወለ እንዴ ፈትሐናመ ኢንቅርኡ። ለገረመ ሰርኅ ቤት ቱ።
- ዐውቱ እግል ተአሕተፍል እበ ዐባይ ዐውቱ እግል ትግበእ ሸርጥ ኢትን። ላመ ነኣይሸ ዐውቱታትከ አስክ ለዐብየ አሕተፍል እበን።
- ገሌሆም እትለ እለ ጌሰው ምስል ለውቀት ልትሃገው እት ሀለው። ገሌሆም ህዬ ግረ እንዴ ሀበወ ዶል ልትሳርሐ ምነ ልትሃገው ምስለ ።



ሐቲ ድግለሊት ተሐሚመመት። ወልደ ህዬ ለሓለተ ዶል ረአ አስክ ሐኪም ነስኣዩ። ለሐኪም ህዬ ተማም እንዴ ፈሐሰዩ። እግለ ወልደ ነቅመ ከከምእነ ቤለዩ። ስምሀኒ ወልዩ። እለ እምከ ምን እሊ ሕማመ እግል ትትዓሬ እከ ተሐዝዩ ህሌክ ምን ገብእ አትሀድየ። ለድግለሊት እብለ ሐኪም ለወሰፊዩ እለ ሰራይ ተህዴት። ሐር ገሌ ወቅት ክም ነስኣው ለእናሰ ህዬ ሐድግዩ። ክም ተሐደገት አዜመ ምን ሐዲሰ እተ መትሐሚማመ አቅበለት። ለወልደ ህዬ ለሓለት ክም ረእ፣ ይመ ቅነጺ ዲብከ ሐኪም ኒጊሰ ዶል ቤለዩ። ህተ ህዬ፣ እግል ሚ ትትዕብ ወተሐት ወለዐል ትትጀረሰ ህሌኩ። ለሰራዬ ግድም ምነ ጊሰትነ ለቀዳሚት አስክለ ሐኪም አምሩ ዐልከ ማሚ። አዜ ህዬ ከፎ ትቀወ እትከ? ቴለቲ።



ሽዑብ ወለመዱ



ዲንክ

ዲንክ ዲብ ግብለት ሱዳን እት ለዋው ኒል-ጸዕደ ለኩብር ቀባይል እት ገብኤ፡ ፍንጌ ግብለታይ-ምፍጋር ጸሓይ እት ሕዱድ ግብለት ሱዳን፡ ሱዳን ወክቶብዩ ህለው።

ዲንክ ዐዋዲ ፍንቱይ ቦም። ምርት ጅናሆም ሐቆ ሞተ።

ለሕያይ ሐሁ ሰነት አዳም ዶል ገብኤ፡ እብ ሰሜቱ ለሀዲ እሉ። ለአጀኒት ዶል ልትዋልዶ፡ ሰሜትለ ማይት እበ ልትሰመው። ለእሴት፡ እሴትለ ሕያይ ነፈርመ ትግበእ ድኢኮን፡ እሴትለ ማይት እንዴ ትበህለት ትትሰሚ።

ሰበት እሴ፡ እናሰን ለሞተ አንሰ ዲንክ ኢመምብሉ፡ ለሐለ ብእሰን ህቱ ወርሰን። መሰለን፡

ሰለሰ ሐው ለማይታም ምኑ ሐ፡ እሰልፍ እሴት ኖሱ ቡ፡ ሐቆህ ሰለሰ አንሰ ሐው ወርሰ። ወእብሊ አርበዕ እሴት እግለን ለአትናብር። እተ አብእሰተን ለሞተ አንሰ ሐው ለወልደዮም አጀኒት ውላድለ ሕያይ ብእሰ እንዴ ኢገብኤ፡ እብ ሰሜትለ ማይታም ልትሰመው።

ሰበት እሴ፡ ዲብ ቆምየት ዲንክ (ጃንግ) ናይ ግብለት ሱዳን፡ ማይታም ኩሎም ለሀዱ በህለት ቱ። ወድ 8 ወሬሕ ዲብ እንቱ ለሸፍዐ ሐሆም ከማን፡ ለሀዱ እሉ። እለ ዓደት እለ ህይ፡ ሰልሰለት ዓይላቶም እግል ተአተላሌ ወልብዝሐ እንዴ ቤለው ለልተብዕዋ ተ።

ዶል ለሀዱ ህይ፡ ለእሴት እብ ንዋይ ቶም ለበዱሉ፡ በህለት ለመርዓዊ እግል ዐድ እሴቱ፡ ሐ ለሀይደም። ወህተ ምስለ እናሰ ለጀዲድ ትነብር፡ ለእናሰ ለማይት ንዋይ ወመምተለካት ዐለ እግሉ ምን ገብኤ፡ ህተ ትወርሱ። እሴ ህይ ለአጀኒቱ እግል ተአትናብር እቡ እንዴ ትበህላ ቱ።



ዓማር ሓኩም አምሮ

ወድ ሐ ለንኡሽ እጋል ልትበህል። እግል አንሰ አው ተብዐት አሸክለለ እንብሉ። ዕምር አሸክለለ ክልኦት ወሬሕ ክም ተዐርረ ላኪን፡ እግል እንብሉ።

እጋል ሐቱ ሰነት ክም ወደ፡ ተንጫፍ ልትበህል። ክልኤ ሰነት ክም ወደ ጀደዕ ልትበህል። ወድ ሐ ሰለሰ ሰነት ክም ወደ፡ በዐል ክልኤ ልትበህል። ሰበቡ ህይ፡ እሴ ወክድ እሴ፡ አንደብ ቀደሙ ገይሰ ወሐር እሰልፍ ክልኤ ኒበት ሰበት ለአብቅል ቱ። ፍሉይ ወድ አርበዕ ሰነት ክም ገብኤ፡ አንደብ ወሐር ሰነት ክም ሐቆ እለ ግድም ለተብዐት ወለአንሰት ረበዕ ልትበህሉ። ምን ሰነት ወሐር ለህለ ወቅት ለአንሰት አሰክ ትትበከር፡ ፍሊት ትትበህል። ለተብዐት ላቱኒ ለገ

ልትበህል።

ለአበጽሕት ሐ ላቱ፡ እግል ፍሊት እንጆት እንብሉ ወእግለ

ለገ (ፍሉይ) ተሰታይ። ክም ትባክረው ህይ፡ ለአንሰት ወኢት ትገብኤ ወለተብዐት ብዕራይ።



ደያሪዬ

ቅርድ ዓዳትነ ዲብ በር ህለ

ደያሪዬ ከአፎ አሰመንኪ? እብዬ ሹቅልት ክም አሰመንኪ ጅማዐቼ አሰአለውኒ። አናመ ሰኒ ሹቁል እብኪ አሰመንኪ። እንቲ ወለት መዲነት እንቲ። ኣነ ህይ እት በር ለትወለደ ወእዜ ዲብ መዲነት ነብር ለህለ። ከኣነ ወእንቲ ለትፈናቱነ ሐቱ ፍክርየት ህሉት። ህተ ህይ፡ ኣነ መንበረት መዲነት ብዘሕ ኢትዐጅበኒ፡ እንቲ ህይ መንበረት በር ኢትዐጅበኪ።

ምናተ ደያሪዬ፡ ሐቱ እግል ነኣምረ ሉብነ ሓጀት ህሉት። ዲብ መዲነት ኩሉ ክዳማት ትረክብ፡ ላኪን ንዋይ ወለእቡ እንብር ሐርሰ ህይ እት ብሩር ህለ። ከአናመ፡ ለገርህት አብዕብዬ፡ ዲብ ሰሜቼ እንዴ ዐዴክወ ሐርሰ ሰበት ህሉት፡ ከረም ልግበእ ወቀደም መብዝሐ ወቅቼ ዲብ ብሩር ሓልፋ። እዜመ ዲብለ ገርህቼ ጋደሰ ዐልኮ።

እት ብሩር ለህለ አሸየእ ግሩም ወኣመርኪ፡ መዲነት ወኢተምኔኪ። ግረህ፡ ማይ ነዲፍ፡ ሀወእ ነዲፍ፡ መቢዐት፡ ወምን ኩሉ ለልዐጅብ ህይ ሽዑብ ብሩር ሞዑም፡ ሴድያይ፡ ጸጋይ፡ ዓዳቱ ለልሐሽም ወሰኒ ለልአምር ዶል ትርኢ፡ “ያሬት ዲመ እተ ከብዶም ወነበርኮ!” ወትብይ። ከኣነ ዲመ አሰክ በር ለእሳፍር እቡ ሰበብ፡ እሴ ሽዑብ ጸጋይ ምን ቅያሰ ወለዐል ለዐጅበኒ፡ ወለዓዳት ክኣነ ምን መዲነት እት አትቃብል ኢትሓፈዝኮ ዲቡ ምን ገብኤ፡ እግል ልብዴ ምንዬ ሰበት እፈርህ ቱ።

እንቲመ አብዕብኪ ወድ በር ዐሉ፡ ላኪን ዓዳት ወመንበረት በር ኢትአሚረ ወኢትዐጅበኒ። ሰበት እሴ፡ አምዕል ሐቱ እሴ ዓዳት በር ዐድኪ እግል ልሕዝኪ ቱ። ከላዝም ዓዳትኪ እግል ተኣምረ እት ክል ሰነት፡ ገንሓት በር እግል ተአትሐዜኪ ቱ ደያሪዬ። መንበረት መዲነት ሞዕም ቱ፡ ላኪን ለነቅሰ ምነ አሸየእ ብዘሕ ህለ። ህዳይ ምንዲ ትወዴ አሰል ዓዳት ለአለቡ እብ አዳም ወደዩ ለትተለዩ፡ አከይ-ዝሕ ዐዋዲ ቀበቱ ትብዴ። እት ሳልፍ ወሰዳይት ግድዓም'መ እብ ኢናይኪ ሰዋልፍ ትሄርራ።

እሴታት እግልነ ኤረትርዩን፡ ምን ዐዋዲነ ለአፈግረነ ሰበት ህሉ፡ አሰል ዐዋዲነ እግል ንዕቀብ፡ ምንበረት ብሩር ንፍቱ ወንዕጅብ እግል ኢበለኪ ቱ ዮም እክትብ ዲብኪ ለህሉት። ሰበት ትፈቲኒ፡ ኣነ ለእብለኪተ ክም ትሰምዐየ ወእት ፍዕል ተአውዲለ ሰኒ ዳሊ ህሉት፡ ላኪን እግል ላብብ ኔገርት ወእግል ግሉል አሰአሎት ለመሰለ ሰበት ቱ፡ እኔግረኪ ህሉት።

ከደያሪዬ፡ እት መዲነት እንብር እቡ ለህሉነ ሰበብ፡ በር ምን ህለ ሌግ ቱ። መዐር፡ ሐሳብ፡ እክል፡ ሰን፡ ናይ ሰናዐት በስክዊት፡ መዐለባት፡ ሰከር፡ ቡን፡ ፋል፡ ዐደሰ፡ ዐተር፡ ጃላቱ ውበዕድ ፈርያትን፡ ኩሉ አሰሉ ምን ብሩር ቱ። ዲብ መዲነት ህይ ልትሰነዕ ወእባሁ ልትበለዕ።


መዲነት እተይ አለቡ፡ አብያት ብኸእ እግል መካትብ፡ ትጃረት ወሰከን ሌጠ ብዲበ። ለተጃረት ብዳዐተ ምን ብሩር ትመጽእ፡ ለክዳማት መዲነት ሰኒ ሰበት ገብኦ በህለት እትሳላት፡ መዋሰላት ውቱክኖሎጂ ላቱኒ አማን ተሐይሰ እት መዲነት ለሐይሰ። እምበል ሸክ ህይ፡ ህቱቱ ለልኣፈቱኪ ተ ህለ እለ መዲነት።

ብሩር ዐድናመ አምዕል ሐቱ መዳይን እግል ልግበእ ቱ፡ ተጠውር እብ ሸበህ ሸበህ ሰበት ልሄርር ቱ ድኢኮን፡ ሐቆ ሕርየትመ የም ለአለቡ ተጠውራት ወኣሳሰ መዳይን ዮመቱ ዲብ ብሩር ሐድ ኢህለ። ላኪን ወቅት ነሰእ ገብኤ፡ ከከራዬ ወከራኪ እት ብሩር አትቃበልነ ውብሩር ለልትጠወር እቡ መጃላት እቱ ሐዘነነ ወዲነ ምን ገብኤ፡ ዐድነ እግል ትጠወር ቱ። በር ዐድናመ እት ተጠውር እግል ለአሳድር ቱ። ክምለ ናይ መዳይን ህይ ዕሉማም፡ ዳርሳም ወዋወራም ውላድ ዐድ እግል ልቀዱሙ ቱ። ከክሊነ በር ዐድነ ፈቱነ ምን ገብኤ፡ ዓዳትነ ወኣሰልየቱ፡ ጅንሰየትነ ወኣሰልየተ እግል ንዕቀብ ክም ቱ ይቁን ህሉት። ከሰደይኒ ደያሪዬ። እሴ ወደሐንኪ።

አዳወርት ሽዕር

ደሀብ ላቱ ምን ቅሩብ ልትረከብ
ወሐቆ ሐዜካመ አሰራዲ ወቀሰብ
ላኪን ለደቂቀት ሐቆ ትትሀርብ
ኢትአቀብል እብ ሐሰብ
ወሰይፍ ተ ሰጋድክ እግል ኢትግረብ
ትነፈዕ እበ እብ ዋጅብ ህተ ትቀሌ ምን ደሀብ።

ሉል ወደሀብ እት ትትካረፍ
እብ ወቅት 'ግል ኢትትዐንቀፍ
ሰለል ወቅት ጽረገ፡
እብ ወቅት እግል ኢትትሸልተፍ
ቀሎት ወቅት እተ ትነህፍ
ዲብ ማል እንዴ ኢትትገህፍ
ብላሽ ለልሐልፍ ወቅትክ እቱ ተአሰፍ
ወቅት ኩሉ ሰበት ቱ፡ ሳክት 'ግል ኢልሕለፍ
ተጃረትመ እት ቀበት ወቅት ተ ለትትጃቀፍ።



ጅግራታት አጅህዘት ውዛረት ድፈዕ ለአተላሌ



ሄርሞን ሚኪኤል እት ባድሚንተን ልትዐወት

እት ሚዳን ጂምናዝየም መዐሰከር ደንደን ለገብእ ጅግረ ባድሚንተን እግል ደረጃት ወጃእዘት ሰልፍ ገብአ።

ናይ ካቲመ ጅግራሁ እንዴ አታመመ ሌኩን ሙሉጌታ ናይ ሂምቦል ምስል ማትያስ ክፍሎም ናይ አባላኒ ቶም እግል ደረጃት ለተልሀው። ሌኩን ህዩ 2-1 ተዐወተ ወናይ 3ይ ደረጃት አካሉ ሐጠጠ።

ለተሌት ትልህዩ እት ፍንጌ ሄርሞን ሚኪኤል ናይ ሐሊበት ወናሆም ገብረኪዳን ናይ ሳቡር ተ። አወላይት ሴት ናሆም ልትዐወት ዲበ እት ሀላ፡ እት ተለዩ ሴታት ህዩ ሄርሞን ሚኪኤል ክልኤ ኢነት ደርብ-ሕድ ሰበት ቀልቡ፡ 2-1 ተዐወተ። እብ አሳሰ እሊ፡ ሄርሞን ሚኪኤል፡ ናሆም ገብረኪዳን ወሌኩን ሙሉጌታ ምን 1ይ-3ይ ደረጃት እንዴ በሐተው፡ ናይ ማል ወመዳልያት ጀዋእዝ ጃቀፈው።



እምበል እሊመ፡ እት ሚዳን ካምቦ-ቼፔሮ ጅግረ ኮበሪት እግር ጋብእ ዐለ። እሰልፍ ፈሪቅ ዒታሮ ምስል እግል ፍርዕ እዳረት ለወከለት አራግ ተልሀው። ሐለት ክልኦት ለፈሪቅ ሕድ ካርዐት ዲብ መሰል አንበተት። እግል ዕርፍ ህዩ እምበል ጎል ደሮን ፈግረው።



ሐቕ ዕርፍ ፈሪቅ ዒታሮ ቱ ዲብ ቦርታ አራግ ጀርቤታት ለአውሐዘ። ሰለሙን ገብረመስቀል ህዩ ዲብ 59 ደቂቀት እግል

ፈሪቅ ሕሳል ሚርሐት አጽበጦ። ፈሪቅ አራግ ለአተ ዲቦም ጎል እግል ልብለሶ ዲብ ቦርታ ዒታሮ ሐድ ክወር ኢለአከው። ለትሩድ ሓርስ ዒታሮ ሚልዮን ላኪን ሓላፎም አበ። እብ ድዱ ከዋ መዳፍዐቱ እትሩድ ለዐለ ፈሪቅ ዒታሮ ቱ ደርብ-ሕድ ተኽለት ሓገስ ወሚኪኤል ሃብቱ (ትንሹ) ክልኦት ጎል እንዴ አትዐረው፡ ዒታሮ እግል አራግ 3-0 ተዐወተው ዲቦም። ዒታሮ መአይደቱ እንዴ ረይሐ ንቅጡቱ ዲብ 8 ወቀለዩ።

ለካልኦይት ትልህዩ፡ ናይ አባላኒ ወሂምቦል ዐለት። እሎም ክልኦት ፈሪቅ ክል ምኖም 5 ንቅጡት እንዴ ጸብግ ቱ ሚዳን ለአተ። ወእብሊ መጃገረት ድቅብት ክም ለአርኡ መተቅብለቶም ምን ጽባብሎም ዳልያም ዐለው።

ትልህዩ ክም እንበተት፡ እሰልፍ

እብ መተልህያዩ ቱድሮስ ገዳም ጎል ለአተ ፈሪቅ ሂምቦል ዐለ፡ አባላኒመ እንዴ ኢደንግሮ፡ እት ቀበት ክልኤ ደቂቀት እብ ሙሴ ተኽላይ ለረክበዉ ጎል ሰበት አትዐረው፡ ለፍረቅ ተዓደለ። ዕርፍ እንዴ ኢተምም ኤርምያስ ሰመሬ እግል ፈሪቅ ሂምቦም ሚርሐት ለልአጸብጥ ጎል ሰበት ወሰኩ፡ ትልህዩ 2-1 እግል ዕርፍ ፈግረው። ሐቕ ዕርፍ ለወሰከዉ አግዋል ሰበት ይዐለ፡ ሂምቦል እበ ቀዳሚት ሚርሐቱ እንዴ ትሰደ፡ ምስል ፈሪቅ ዒታሮ አክልሕድ ጋብእ ሀላ።

ሰሚር ጀግል

ድቁብ ፍረቅ አርብ እት ጅግረ

እግል ሐሊፍ ዲብ ካስ ድወል አርብ 2020፡ ምን ድወል ለልሐልፍ 24 ፈሪቅ እግል ፈረጎት ድቁብ ትልህያታት ገብእ ሀላ። እብ አሳሰ እሊ ምን ማሌ ለሀ ለተልሀ ፍረቅ፡ ሩሰዩ እግል ቁብርስ 5-0፡ ሁንጋሪ እግል አዘርቢጃን 1-0፡ ጀርመን እግል ኢስቶንዩ 3-0፡ አውስትሪያ እግል ሰሎቪንዩ 1-0፡ ፖላንድ እግል ቅብለት መቅዶንዩ 2-0፡ ዌልስ ወክሮኤሽዩ ህዩ 1-1 ትፈናተው።



ማሌ ለገብእ ትልህያታት ህዩ፡ አልባንዩ እግል ሞልዶቫ 1-0፡ አየርላንድ እግል አንዶሪ፡ 2-0፡ ኮሶቮ እግል ሞንቴኔግሮ፡ 2-0፡ ኢንግላንድ እግል ቡልጋርያ 6-0፡ ሴርብያ እግል ሊትዋንዩ 2-1፡ ዩክሬን እግል ፖርቱጋል 2-1 ሳርሓህን ዲብ ህለዩ፡ ፈረንሳ ወቱርኪ ህዩ 1-1 ትፈናተዩ።

እሊ ዲብ 10 መጅሙዐት ኩፋል ለሀለ ፍረቅ ትልህዩ ግርም ዲብ ለአርኤ፡ እት መጅሙዐት ሐቱ እንግሊዝ፡ ጀምሁርያት ቼክ፡ ኮሶቮ፡ ሞንቴኔግሮ ወቡልጋርያ፡ ዲብ መጅሙዐት ክልኤ፡ ዩክሬን፡ ፖርቱጋል፡ ሴርብያ፡ ላክሰምበርግ ወሊትዋንዩ፡ ዲብ መጅሙዐት ሰለስ ኔዘርላንድስ፡ ጀርመን፡ ቅ.አየርላንድ፡ ቤላሩስ ወኢስቶንዩ፡ እት መጅሙዐት አርበዕ አየርላንድ፡ ዴንማርክ፡ ስዊዘርላንድ፡ ጆርጅያ ወጀበልግርቅ፡ መጅሙዐት ሐምሴ፡ ክሮኤሽያ፡ ሁንጋሪ፡ ሰሎቫካካ፡ ዌልስ ወአዘርቢጃን ሕዩባት ህለዩ።

መጅሙዐት ሰስ፡ ስፐይን፡ ስዊድን፡ ሮማንያ፡ ፍርወይ፡ ማልተ ወጀዚረት ፋርይ፡ መጅሙዐት ሰቦ፡ ፖላንድ፡ አውስትሪያ፡ ቅ.መቅዶንዩ፡ ሰሎቪንዩ፡ እስራኤል ወላቲቭዩ፡ መጅሙዐት ሰማን፡ ቱርኪ፡ ፈረንሳ፡ ኢደስላንድ፡ አልባንዩ፡ አንዶሪ፡ ሞልዶቫ፡ መጅሙዐት ሴዕ፡ ቤልጁም፡ ሩሰዩ፡ ቅብርስ፡ ስኮትላንድ፡ ካዘክስታን፡ ሳን-ማሪኖ፡ መጅሙዐት ዐስር፡ ኢጣልያ፡ ፊንላንድ፡ አርሚንዩ፡ ቦዝንያ-ሄርዜጎቪና፡ ግሪክ ወሊትቲንስቲን ሕዩባት ህለዩ።

ምን እሊ ፍረቅ፡ እንግሊዝ፡ ዩክሬን፡ ኔዘርላንድስ፡ አየርላንድ፡ ክሮኤሽያ፡ ስፐይን፡ ቱርኪ፡ፖላንድ፡ ቤልጁም ወኢጣልያ ሐቲክ ምን መጃምዐተ እብ ለሐሰ ንቃዋ ትመሬሕ ህሌት። እትሊ ሚመይ ድቁብ ፍረቅ አርብ ህዩ፡ 55 ደውለት ሻርክ ህለዩ።



ጅግረ ካስ ደዋር ዐጀላት ዲብ አሰመረ

እግል አውረሐት ጅግረ ሱቱት ለኢጸንሐ ወምን ናይ ወቅት እት ንቃዋ ለአቅበለ ፈደሬሽን ጅግረ ዐጀላት አቅሊም ምግብ፡ ማሌ-ለሀ ዲብ ሲጎመት ሮመ እበ ነዘመዩ ሰልፋይት መርሐለት ጅግረ ካስ ደዋር ናይ ዐጀላት አንበተ።

እትሊ ናይ ሰለስ መርሐለት ጅግረ፡ መትጃግረት አወላይ ዲቪዝዮን እግል ፕሮፌሽናል መተልህዮቶም ክም ዳንኤል ተኽሊሃይማኖት፡ መርሃዊ ቅዱስ፡ ሚሮን ተሾሚ ውበዕዳም እንዴ ሐዩበው ትበገሰው። እት 110 ኪሎምትር ለገልበበ ጅግረ፡ መትባድረት ሰላዲ ለልአከሰብ ክልኦት ጅግረ ሾላተ እንዴ

ወደው ቱ ዲብለ ናይ አክር ሾላተ ለትዐደው። ለበዝሐ ደውራት መርሐ ለአጽበሐው ፕሮፌሽናል መትባድረት ዐጀላት እት ናይ ደንጎበ ዱረት ዲብለ በጽሐው ዲበ ኢነት፡ ናሆም መኮንን(ሲምባ)



መድሃኔ ሰልሲቶም ምን አሰቤት፡ ክምሰልሁመ አቤል ሮቤል ምን ኤሌክትሮላይት ምን 1ይ-10ይ ተርቲብ ጸብጠው።

መትጃግረት 2ይ ዲቪዝዮን መ ናይ 99 ኪሎምትር ጅግረ ዋድያም ዐለው። ጸዋሮስ መንግስ ወዩኤል ኤፍሬም ክልኡቶም ምን ፈሪቅ ዐጀላት ኤራቴል፡ አወላይ ወካልኦይ ፈግሮ ዲብ ህለው፡ ብሩኽ ሰልጣን ምን ደንደን፡ ናሆም ገዛኢ ምን ኤራቴል፡ ዳንኤል ይሕደጎ ወግርማይ ዮውሃንስ ክልኡቶም እብ ብሕቶት፡ ሰሚር ብርሃን ወናሆም መንገሻ ክልኡቶም ምን ሰምበል፡ አማን መ/ዐለ ምን ግብለት፡ ክምሰልሁመ


ኢሰያስ ውሂቤ እብ ብሕቶት ምን አወላይ አሰክ ዓሰራይ ተርቲብ አሰረረው።

አዋልድ ዲበ ወደያሁ ጅግረ ዐጀላት 80 ኪሎ ሜተር ህዩ፡ ሚሊና ያፌት ምን ሰራይር ሳዋ አወላይት፡ ሞሳና ደበሳይ ምን ደንደን፡ ሱዛና ፍሰሃዬ ወሞናሊዛ አርአዩ ክልኡተን ምን ግብለት፡ አርሴማ ግርማይ ምን ደንደን ውበሰራት ገ/መሰቀል እብ ብሕቶት ምን 1ይ-6ይ ተርቲብ ፈግረዩ።

3ይ ዲቪዝዮን ውላድመ ናይ 77 ኪሎሜተር ጅግረ ዐጀላት ወደው። እት ጅግረ ህዩ ሴም ግርማይ ምን አቅሊም ግብለት ተዐወተ።



ገሮብን ሚ ብእቱ?



ገሮብ አደሚ ምን ሰገ፡ ደም ወዳጭሞታት ለትከወና ቱ። እሊ ደም፡ ሰገ ወዳጭሞታት፡ ሴላት ጀንጀን እቡ ብኑይ ቱ።

ገሮብን እብ ዓመት 30,000 ቢልዮን ሴላት ደም ቀይሒት ብእቱ። እምበል እሊመ ገሮብ አደሚ 60,000 ማይል ሪም ለቡ አሰራር ደም ብዲቡ። እት ክል ካልኢት ገሮብን 2.5 ሚልዮን ሴላት ደም ቀይሒት ሸቁ። እሊ በሀለት እት ክል ምዕል ገሮብን 200 ቢልዮን ሴላት ደም ቀይሒት ሸቁ። ልብን ህዩ እት ሰገት 30 ሚልዮን ኢነት ክም ትዘብጥ አው ተህንድግ ተአምሮ ማሚ?

ከገሌ እብ ሰበት ገሮብን ለትአመረ ዕልማይ ሐቃይቅ

- 1, ክልኤ ክንክልኦት ብኑ ምናተ እግል ንንበር ላተ ሐቱመ ትከፊ።
- 2, ምጥራቅ ሕምብረ ወድ አዳም፡ ነኦይሽ ወፍንቱይ ጭገር ተአበቅል፡ እሊ ጭገር እሊ ለነኢሽ

አግዳድ ወክፍከፍ ግጥን ወለቡበስ እት ኩብድን እግል ኢልእቱ ትከርቡ ምኒኑ።

- 3, ምን ኩሎም መክሉቃት፡ ሸድግ ለቡ አዳም ሌጣ ቱ።
- 4, ቀርቦትኑ ለበበ ክፊል ገሮብና ቱ። 15 ምእታይት ናይ ኩሎ ሚዞን ገሮብን ህዩ ትነሰእ።
- 5, ረሐት፡ ምን ኩሎ ክፋላት ገሮብን እብ ህንቅጥቀጥ ለትሸዕር ወለተአትሰሕቀነ ክፋል እግርና ቱ።
- 6, ዶል ክጅል ገጽ አንስ ዝያት ቀዩሕ፡ እሊ ህዩ እብ ሰቡብ ሆርሞን አድሬናሊን ቱ።
- 7, ልብን እት ታምም ዕምርኑ፡ 3 ቢልዮን ኢነት ተህንድግ።
- 8, ንሳልነ ምን ሰማን ሰዕድ ለትበና ቱ። እሊ ህዩ ምስል ከርቱሽ ሐርማዝ ለአትማስሉ።

ገሮብ አደሚ መሳኔዕ ብዞሕ ብእቱ። ክል መስከሪ ህዩ ናዩ ፍገሪት ሸጋቡ ብእቱ። ሰበት እሊ፡ ገሮብ አደሚ እብ ብንዩቱ ወክልቀቱ ዐጃይቦታት ብዞሕ ራፊዕ ክም ሀለ አመሮት ለአትሐዜ።

ሕካዮት እለ ሱረት



እለ አሰፊህ ድቢ ልሰዔ ትርእወ ለህሌኩም ወሌተት፡ አቡሀ ወእመ እት ሐቱ አካን ተምሸዮት እንዴ ነሰአው፡ ህቶም የም ህጅኩም ክም ገብአው፡ ህተ እተ ባካት ዲብ ትተልሄ አመት እንዴ አለበ አፊመት ምናም። ወለድቢ ትቃበለዩ።

እበ በራአተ ህዩ አሰክ እመ ወአቡሀ ትሰዔ ምኑ ህሌት። እለ ሱረት እት መጃል ተሰዊር መክሐደ ብዝሕት ህርሰት ህሌት። ለሱረት ናይ አማን ሐቆ ገብአት፡ ለመሰውራዮ፡ ቀደም ሰወሮቱ እግል ሚ እግለ ወለት እግል ለአተክሬ ኢትሳሰዐ?

ሰበት እሊ እንሳንዮት ለኢትአርኤ ሱረት ቱ፡ ልብሎ ሰሮም። ሰሮም ህዩ፡ “በራአተ ናይ ንኢሽ ለትሸፊሕ ሰበት ቱ፡ ሱረት ሰኔት ቱ” ልብሎ። እንተ አው እንቲ መሰውራይለ ሱረት ምን ተዐሉ፡ ሚ ወወዳኩም ገብእ፤ እንቱም ከማን ናይኩም ተ በሎ ዲበ።

ህግዩ

ህግዩ አዳም ለልትፋህም እበ ገበይ መዋሰለት ቱ። እብ ህግዩ ትትፋህም፡ ምናተ ህግዩህም ለኢትአምር ዶል ትረክብ፡ እብ አሻይር ትትፋህም።

ከዲብ ዐለም ከም ሀገጊ ሀለ ገብእ? እት እዲን 6,500 ህግዩ ህለዩ። ምን እለን ሀገጊት 2000 ለገብእ ህግዩ፡ መትሃግዩተን ምን 1000 ለኢበዝሐ ቶም።

ለሐደው ለልትሃገወ ህግዩ፡ ንጄርፕ ለትትበህል ምን ካሚሩን ለሰርተት ህግዩ፡ አዜ ዲብ ናይጄርፕ 4 ነፊር ሌጠ ልትሃገወ። ምን እሎም አርበዕ መትሃግዩት ንጄርፕ፡ ለነኢሽ

እናስ ወድ 60 ሰነት ሀለ፡ ሰበት እሊ ንጄርፕ ቅሩብ በደ ለህሌት ህግዩ አፍሪቃ ቱ።

እግል ትትዐለመን ለቀለዩ ሀገጊት ዐለም ህግዩ ኖርወይ፡ ሰዌዲሽ ወስፓኒሽ እት ገብኡ፡ እት መትሃግዩት እንግሊዝ ለኩበደ ሀገጊት ህዩ ማንደሪን፡ ዐረብ፡ ፖላንድ ወሩሲያ ቱን።

መትሃግዩት ለበን ሀገጊ 6,500 ምንመ እንቤለን፡ ለልትኩተብ ሀገጊት ህዩ 7,106 ህግዩ ባጼሕ ሀለ። ሰበት እሊ መትሃግዩት ለአለቡ ሀገጊ፡ ዲብ አክትብት ሰበት ጸንሐ፡ ምን ሞት (ሰሪት) ናግፍ ሀለ።

ሰማን ለበዝሐ ሽዑብ

ዐለም ለልትሃገዩን ሀገጊ

- 1, ማንደሪን አው ህግዩ ቻይነ = 1.1 ቢልዮን ሽዑብ ልትሃገወ
- 2, እንግሊዝ = 983 ሚልዮን መትሃግዩት በ
- 3, ሂንዱስታኒ = 544 ሚልዮን መትሃግዩት በ
- 4, ሲንጌስ = 527 ሚልዮን ሽዑብ ልትሃገዩ
- 5, ዐረቢ = 422 ሚልዮን ሽዑብ ልትሃገወ
- 6, ማላይ = 281 ሚልዮን አዳም ልትሃገዩ
- 7, ሩሲያ = 267 ሚልዮን አዳም በ
- 8, ቤንጋሊ = 261 ሚልዮን አዳም ልትሃገዩ

ገሌ ምን ድወል አፍሪቀ

ሶማልያ



ሶማልያ ሐቱ ምን እት ቀር አፍሪቀ ለሀለ ድወል ዐባዩ እት ገብእ፡ ዓሲመተ መቃዲሾ ትትበህል። ርሕብ ምድረ 637,657 ኪሎምትር መረበዕ ቱ። ምስል አቶብዩ፡ ጅቡቲ ወኬንዩ ህዩ ትትሓደድ። ብዝሐ ሸዐበ 15 ሚልዮን በጼሕ። ሸዐበ ህግዩ ሶማል ልትሃጌ። ዐረቢመ 2ይት ህግዩህም ቱ። ሐቱ ቆምዮት ወኦር ዲን ሌጣ ቶም።

ሰይላዕ፡ በርበራ፡ ቦሳሶ፡ ኪሰማዮ፡ ሓፋን፡ ዕይል፡ ሆብዮ፡ ማርካ፡ ባራዌ ወጀማሚ ምን እት ለዋው ምሒጥ ህንድ ለሀለዩ ዐባዩ መዳይን ወክም ሚናት ለከድማ ቱን።

ሶማልያ እብ አርዛቅ ጠቢዐት እምር ቱ፡ እብ ንዋይ ክም እንሰ፡ አጣል ወአባጊዕ ሰሚት ደውለት ቱ። ምንለ ቅያስ ሰማን ወሬሕ

ለዘልም ምድር አቶብዩ ለልትበገስ አንሃር ገሌ ሰበት ከይደ፡ እት አጥራፍለ አንሃር ጀራዲን ወሐርስ ብዞሕ ወዱ። ክሱሰን ባካት አንሃር ጃባ ወሸቤሊ እብ እተይ በናን ሰኒ ታጅር ምድር ቱ። ብዕድ ኩዳር ወሐምሌመ በቅል ዲቡ።

ለዋው በሐር (ምሒጥ ህንድ) ጀምሁርዮት ሶማልያ 3,333 ኪሎምትር ገብእ። ሰበት እሊ፡ ሶማልያ ለበዝሐ ምን በሐር ለትመልክ ደውለት አፍሪቃ ቱ።

ሶማልያ ብዞሕ ርዝቅ ጠቢዐት ለትመልክ ደውለት ቱ። ገሌ ምን አርዛቅ ዩራንቱም፡ ትክክ፡ ሐጺን፡ ይብሰ፡ ቦክሳይት፡ ነሓሰ፡ ጩወት ወጋዝ-ጠቢዐት (Natural Gas) እግል ንሳሚ እንቀድር። ምስል ድወል ከሊጅ ዐረብ (ከረ ሰዑድዩ ወዩመን) እበ ባ ቱ ቅርብ ህዩ፡

ሶማልያ እብለ ኢትሐንፊለ ርዝቅ ቢትሮል ታጅረት ክም ተ ልትሀደግ።

ለእሉ ተአሰድር ሓጃት ክም ንዋይ፡ በናን፡ ቅራብ፡ ዓሳ፡ ፈሐም ወሐዲድ አሰክ ከረ የመን፡ እግራት ወዶማን ትጎድኡ። ለትአስተውርዱ ህዩ ብዳዐት ሰናዐት ወብትሮል እብ ብዝሐ ሸምል።

ምን እት እዲን ለህሌት 16 ሚልዮን ለትገብእ እንሰ ተዋብ፡ 7 ሚልዮን ረከሰ እት ሶማል ትውብ ሰበት ቱ፡ ሶማልያ እብ ተዋብ እንሰ እት እዲን ሰልፋይት ደረጀት ትጽብጥ።

ሶማልያ ምድረ መብዝሐ ባዶብ ወሸብህ ባዶብ ልግበእመ እንድኢኮን፡ ብቀሉ ብዞሕ ቱ። ትርብት ምድራመ ታጅረት ቱ፡ ምናተ ለበዝሐ ሸዐበ እብ ርዕዮ ንዋይ ቱ ለልትናበር።